


Степан
Раевский



ТЕПЛУХЕ
РЕЖУ
КОЗИН



Стенан
Раевский



ЖИМЛУН
КЕЖЛО
КОЗИН

Школаын велӧдчысь
посни арлыда челядьлы
висъясь

Сыктывкар
Коми книжной издательство
1995

Библиотека
Средняя школа №43
г.Сыктывкар
Инв.

84.2 Рос-Коми

P16

Раевский С. С.

P16 Нимлун кeжлö кoзин: Висьтьяс.— Сыктывкар: Коми книжнöй издательство, 1995.— 64 л. б.

ISBN 5-7555-0538-1

Степан Раевскийлөн петалис нин челядылы лыдыём былö "Шоныд войвыв" коми да роч кывъяс вылын, "Пемöсьяс йылысь сёрни-басни" книгагас.

"Нимлун кeжлö кoзин" сідзжö адресуйтöма школаын велöдчысь посни арлыда челядылы. Тайö книгагас кык юкöна. Водза юкöнас автор петкөдлö сиктса челядылысь олём-выломсö, налысь интересъяссö да тöждлунсö, налысь быдтор тöдны көсиймъяссö. Став висьтьясыс йиджтысьöмаöсь небыдик, кокни юморон. Книгалөн мөд юкöныс — пемöсьяслөн приключенияс йылысь висьтьяс-мойдъяс.

84.2 Рос-Коми

P $\frac{4803010200-006}{M 128 (03) - 95}$ 15 — 95 м

© Раевский С. С., 1995

© Моторин В. А., художник, 1995

© Коми книжнöй издательство, 1995

ISBN 5-7555-0538-1

НИМЛУН КЕЖЛӨ КОЗИН



НИМЛУН КЕЖЛӨ КОЗИН

Висьт

Дима велөдчө первой классын. Талун сылы тырө стөч көкъямыс арөс. Сылөн нимлуныс веськалі буретш вөскресенньо лунө, и вештыны сійөс мөд лун вылө оз ковмы. Висьö кө, шуам, тэнад пиньыд, то поликлиникаө верман мунны аски либө недель мысти, а нимлун нюжөдны оз шогмы... Дима радейтис чужанлунсө, сы вөсна мый сэки вайлісны сылы уна пөлөс козин. Тайө пөрийө бөкөвөй йөзсө некодөс эз корны. Нимлун вылас лооны сөмын дедыс да бабыс, кодъяс төрыт рытнас воисны сиктысь.

Дималөн мамыс пусис-пөжасис кухняын, дасьтис празник кежлө өбед.

Дималөн сьөлөм вылас вөлі кыпыд, мыйөн садьмис, трусик кежсьыс котөрөн мунис мамыс дөрө.

— Мам, а мам! А көнөсь нө дедуля да бабуля?

— Көнөсь? Найө өд тэ моз оз узьны... Мунисны базарө тэныд козин корсьны... Тэ мун да мыссьы, сэсся ассьыд комнататө идрав, чачаясыд джодж шөрас валяйтчөны, — тшөктис мамыс.

— Ладнө... Удита на. Мам, а мам?.. А бабыд мян космосө лэбліс?..

— Мыйла космосө? — эз гөгөрво мамыс.

— Да сылөн жө морөсас Зарни Звезда дзирдалө да Ленин орден... Звездасө сетөны налы, коді лэбзьылө космосө... Тайө меным Ваня Титов висьталіс.

— Ай-ай-ай! Космосө, шуан? Да тэнад бабыд комын во сайө уджаліс совхозын дояркаөн... Тэ... йөвсө юны радейтан? А выя няньтө?

— Дерт жө радейта...

— То-то... Вот сійө, тэнад бабыд, тэнө да уна-уна челядьөс вердіс йөвнас, и выйнас... Со и сылы дыр да бура уджалөмсьыс сетөмаөсь Герой нимсө... Öні сійө пенсия вылын, оз нин уджав, со локтөмаөсь дедыдкөд

миянө гөститны, тэнө видлыны... Локтас да тэ ачыл юась бабыдлысь. А өні марш, мун идрав комнататө,— найө регыд локтасны.

Дима тэрыба лөсьөдіс асьыс крөватсьө, тупкис сійөс мича выль покрывалаөн, сэсся кутіс чукөртны асьыс чачаяссө. А чачаыс вөлі уна-уна. Мыйсюрө сійө тэчаліс ыджыд көрөбкаө да вештіс крөват улас. Асьыс "армиясө" петкөдаліс коридорө өдзөс дорас да сувтөдаліс стройө. Медводзын сулалісны танкъяс, на бөрти артиллерия — пушкаяс да ракетаяс, а на бөрын — эзысь салдатъяс. Бокинджык — самолётъяс да корабляс. Сэсся морөсас сійө өшөдіс выль ыджыд автомат, кодөс төрыт козыналіс сылы мамыс.

Автоматыс вөлі настоящөй кодь, гораа трачкөдчислйисис, а лыйсигас ствол помсьыс сывкйисны-петісны гөрд би кывъяс... "Муна да дзеба сійөс өдзөс сайө,— думыштіс Дима.— А кор дед да баб локтасны, сэки ме..."

Дималы талун торйөн гажа, инас оз өшйы. Кор эштөдіс асьыс уджсө, сійө пырис ыджыд комнатаө батыс дінө.

— Папа, а пап!— пыригмозыс горөдіс сійө.— Ме көсья тэнсьыд өтитор юавны... Позьө?

— Пөжалуйста... Мыйла нө оз позь? Көть кыктор юав,— вочавидзис батыс да ныр улас паськөдіс газет.

— Пап, кывзы... Тэ төдан, талун менам нимлун... Стөч көкъямыс арөс тырө... Кыдз тэ чайтан, мый эськө меным козыналас талун дедульөй?.. Он төд?..

— Мда... Сьөкыд, другө, вочавидзны тэныд, имениник өрт... Тэ өд командирөн көсьян лоны? А сійө вөвлөм моряк!.. Колө чайтны, сійө козыналас тэныд, шуам, зарни пуртөса адмиральскөй кортик... Но, а оз кө сійөс, этша вылө нин вермас козынавны турецкөй сабля...

Дималы тайө эз кажитчы...

— Ме тэнсьыд збыльысь юала, а тэ век сералан,— шуис батыслы да петіс мамыс дорө кухняө. Батыс нюмъялігтыр видзөдіс пиыс бөрся.

Дедыс да бабыс важөн нин көсйисны локны карас, но слөймисны сөмын өні. Найө, дерт, төдісны, мый внукуслөн матысмө нимлун, но сельмагысь нинөм

коланаыс эз сюр. Шуйсны мыйкө босътны карыс, и со талун асывсыяны мунисны базарө. Корсысисны вель дыр, но нинөм сэтшөмыс эз сюр. Павильонысь петігас нин кутшөмкө съод уска дядьö (абу татчөс, буракö, кыськө лунвылысь локтöма) кутіс вöзйыны ньöбны аквариум. Дед думайтыштіс, сэсся донъясьтөг и ньöбис. Козинсö бура гаровтісны шыльыд бумагаөн да көрталісны мича лөз лентаөн.

Дедсö да бабсö дыр виччысьны эз ковмы. Регыд мысти найö сулалісны нин квартира öдзöс водзын. Дед көсйис нин личкыштны кнопкасö, медым звөнитны, но думыштіс да веськыд кысыс козинсö вуджөдіс шуйга ки вылас. Веськыд кыис öні вöлі прöст: вермас вну-кыслы сетны честь да торжественнöя чолöмавны сійöс. Но öдзөссö восьтіс эз внукуыс, а нылыс.

— Бур лун, нылук!— чолöмаліс сійö.— А көні нö именинникыс? Ди-има, көні тэ, кылан?

И друг:

— Та-та-та-та-та!..

Гораа юрöбтіс автоматнöй öчередь. Би кывъясыс сявкй-исны пöрысь дед вылö. Сійö виччысьтöмысла дрөгмуні, шатовмуні. Орденьясыс да медальясыс зелькнитісны, а мича лентаөн көрталөм козиныс мыні кысыс да уси джоджас, пасьмуні. Дедлөн чужöмыс кельдөдіс, а ачыс нёровтчис стен бердас да съökыда лолаліс. Бабыс шемöс сулаліс öдзöс дорас...

Квартираын лоис шы ни төв, быттöбө биыс кусі. Недыр мысти дед восьтіс синъяссö да кок увсыс аддзис танкъяс, орудиеяс, ракетаяс, самолётъяс, а на дінын — пасьмунöм козиныс — нейджыд аквариум. Джоджас чеччалісны кузь бöжа кык зарни чери.

Дима сулаліс шöйöвошöма, эз тöд, мый вöчны... А сьылі вылас бовъяліс автоматыс. Кор воис ас садяс, век жö шыасис:

— Тэ прöстит менö, дедуль... Ме öд эг нарошнö...— пыдісянь лолаліс сійö.

— И тэ прöстит менö, пöрысь дедтö,— вочавидзис дедыс, сэсся кыкнанныс — копыртчисны да заводитісны

чукортавны стеклоторьяссö. Дедыслөн дөрөм воротникыс восьса и Дима аддзис морөссыйс, сёлөмладорсыйс ыджыд шрам — кольөм ыджыд войनावывса вунөдлытөм пас — пуля туй.

Март 1988. Сыктывкар

К Л Ю Ч

Висьт

Субөтаö ми виччысим школаö гөстьясöс. А төрыт, урокъяс бөрын, ми ставсö весалим, мыскалим, идралим, да сідзи, мый ставыс кутіс лөставны-югъявны, весиг классьясын дөскаяс сідзи дзирдалісны, быттö вөліны шнич выльөсь. Талун вөлі сөмын нель урок, дас кык часын Усогорскыс локтасны миян болгарскöй другьяс. Талун школаын челядь оз котравны, оз чеччавны, оз ызгыны-шумитны, кыдзи век овлө, а кутісны асьнысö рама, лабутнöя, ветлөдлісны быттö кок чунь йыланис. Унаөн сьөрсыйс вайөмаөсь козин пыдди книгаяс, открыткаяс, а миян классысь Лида Шаньгина кыскö аддзөма да вайөма ловья дзоридзьяс. Тайö, дерт, ставыс гөгөрвоана, — миян школаö иностраннöй гөстьяс локтөны первойысь. Öти кывйөн шуны: виччысим.

Залын друг кодкө горөдіс: "Локтісны!" Ме видзөдлі öшиньөд. Збыль, школа дорын сулаліс автобус да сэтысь петалісны гөстьяс. Челядь уськөдчисны улі судтаö: коді котөртö пос кузя, коді исковтö перила кузя. Кор ме лэччи улиас, первойсö нинөм эг гөгөрво, — сэні челядь жуисны быттö кодзувкотьяс: болгарияса школьникьясöс да налысь учительницасö босьтөмаөсь топыд кытшö. Ковмис скойсьыны директорлы да мездыны найöс. Сэсся найö видзөдалісны миянлысь классьяс, кабинетьяс, класснöй да школьнöй стенгазетьяс, миянлысь выставка: "Ми вөчим асьным..." Сэсся залын вөлі мыйкө митинг сяма: гөстьясöс чөлөмаліс миян директор Альбина

Ивановна да школаын медбур велөдчысь Валя Пешкина. Воча кывйён выступитіс налён учительницаыс (вунөді кыз шуёны).

А сэсся? А сэсся вөлі концерт, да ещө кутшөм! Быд выступление бөрын юргисны гора аплодисментъяс. Но медся ёна клопайтисны миян школаса "Катшасинъяс" ансамбльлы, коді весиг сыліс өти сыланкыв болгарскөй кыв вылын. Кор концертыс помасис, сцена вывсянь Альбина Ивановна шуис, мый коді көсйө, вермас часмөд кежлө нуөдлыны гортас гөститны зонкаөс либө нывкаөс.

Ме сэки матыстчи өти зонка дорө да нюжөді киясөс. Сійө вөлі ар дас кыка — дас куима нейджыд тушаа косіник зонка. Бөрвыв шыльөдөм съөд юрсиыс лөсталіс, а съөд синкым улас съөд сэтөр кодь синъясыс мудера нюмъялісны. Сійө первой шыасис:

— Вай төдмасям... Менө шуёны Стоянөн, велөдча сизимөд классын, ола Усогорскын нель во нин... Вай кутам дружитны...

Ме чуйми. Виччыси, мый сійө шыасяс болгар кыв вылын, а сёрнитө рочөн, весиг меысь, гашкө, бурджыка. Вот сійөс и ме нуөді гортө.

Локтім гортө, өдзөсөй игана. Менам эм аслам ключ, век новлөдла портфельын, а талун, быттё нарошнө, эз сюр. Портфельысь перъялі став книгаяс-тетрадьяс, но абу и ставыс!.. Кытчө ме сійөс вошти? Меным, дерт, вөлі яндзим, но мый вөчан? Да сэтчө ещө кытчөкө мамөй мунома... Стоян, дерт, пыр жө гөгөрвоис менсьым шөгөс да гораа серөктіс:

— Төдан, Юра, таво ме кыкысь нин воштылі ключөс...

— А кыз нө пыран гортад?

— Некидз... Муна другъяс ордө... А другыс менам уна, ставыс олөны миян керкаын... Чукөртчам да төлкуйтам, кызди восьтыны өдзөс. Öти шуө, колө пө көрт тувйөн восьтыны, мөд шуө — отвёрткаөн, кодсюрө шулісны, мый позьө и восьтыны лазерөн, либө толөн взорвитны.

— Добре дошли!— пос вылын кодкө шыасис. Ми олам

коймод судтаын. Видзода да Славик Пыстин, менам другой, локто. Сийо висьталома мамыслы, мый мянэ локтис гоститны болгарской школьник, и мянлы ыстома небыд пожас — капустаа пирогъяс, рыська шаньгаяс. Ми пуксим одзос водзо площадка вылас да заводитим чосмасьны небыд няньон. Видзодам да локто Геня Шустиков, вайо кулёкын кампет... Ме косьи нин пыравны соседъяс ордэ да корлыны налысь чайник да чашкаяс, но сэки буретш локтис менам мамой. Ми пырим гортэ, и чай юны ковмис нин квартираын. Мам вайис пызан выло кык сикас варенье, печенье, картофеля шаньга, пирогъяс, кампет... Ми пируйтігад эго и казялой, кыдзи коли кадыс: Стоянлы кад нин мунны.

Кор локтим школа дорэ, ставон нин пукалісны автобусын. Тэрмасигад эз и прамоя удайтчы прощайтчыны, сомын удитим вежсьыны адресъясон. Автобус мунис.

Неважон Стоянсянь ме получити письмо, кони сийо гижэ аслас олөм-вылөм йылысь, велөдчөм йылысь да гожөмнас нуөдө менэ Болгарияэ ветлыны... А письмо помас гижөма: "Тэ, Юра-другарь, юалан, кыдзи ме восьті одзосөс? Да зэв прөста: аслам ключон, сийо вөлома аслам гач зептын... Тэнад, колөкө, сідз жө вөлі?.."

Март, 1988. Сыктывкар

ПАПУЛЯ, МАМУЛЯ, МАКС ДА БАБУЛЯ

Висьт

— Э й, Максим! Макси-и-им! Калябеч, кылан он? Со пемыд нин! Пыр нин гортэ!— өшинь форточкаөд горзис Максимлөн бабыс. Но Максимлы пырны гортас абу окота: челядь чужъялөны футбол, а кыдзи нө сытөг, медбур ворсысьтөгыс?

Сомын кор нин нинөм эз кут тыдавны ывла вылын, йирк-грым воссис керка одзос да гортас төв ныр моз лэбис-пырис Максим, квайтөд классын велөдчысь

детинка. Пальтоыс кизявтөм. Вескыд киас кутө портфель, модас — көвйөдыс футбол мач. Мачсө лэдзис жырйө да гөгыльтөдис пельсөсө.

— О, господи-енмөй! Видзөдлы ас вылад!.. Няйт гуранө водлин али мый?— бокъясас кияснас швачөдигтыр шензис-дивитис внуксө бабыс.— А пальтоыс? А көмыс?

— Ньоти абу няйт! — чушкис нырнас Максим.— Тэ ачылд няйт!

— Час, батыд локтас да ме сорита, кызди тэ мекөд сёрнитан...

— Сорит, колөкө... Да эн дзоргы ме вылө сідз!.. Эн аддзыв?

— Ок и быдтас!.. Код рөдө мунөма? Батыд тай эз вөв татшөм-а.

— Да, ланьт нин, мися... Тупкы пиньтөм вомтө, пөрысь выжыв.

Бабыс, буракө, ещө на мыйкө көсйис шуны, но забеднөысла гөрддзасис горшыс да кинас синъяссө чышкалігтыр пырис аслас ичөтик жырйө.

Воссис мөд өдзөс и узылан комнатаысь петіс Максимлөн мамыс, Анжелика Вениаминовна. Мича шөвк халатсө кизялігмоз, чөскыда очсалігтыр, локтіс пиыс дінө:

— Макс, тэ гортын нин? Менам бура и унмовсьлысьөма,— синъяссө тіліс Анжелика Вениаминовна.

— Ог өд ывлаас узь...— букыштчыліс Максим.

— О-о! Ме видзөда да тэ бара талун футбол чужъялөмыд? Кымынысь ме тэд шулі...

— Кымынысь, кымынысь... Тэ дорын али мый век меным пукавны!— детинка шыбитіс диван вылас портфельсө, сэсса нетшыштіс вывсьыс пальтосө да тшөтш шыбитіс диван вылас. Синъясыс Максимлөн югъялісны, бан бокъясыс гөрдөдөмаөсь. Герой-футболист и эм!

— Макс, ме тэнсьыд ещө өтчылд юала, кор дугдан чужъявны футболсө?— терпениесыс кутіс петны Анжелика Вениаминовна.— О, господи, ставыс няйт! А киясыс? А чужөмыс?

— "О, господи, господи!" — шушкыль кывйөн Максим

нерыштiс мамсö. — Шуöны тэныд, ме эг ворс!

— Кызди нö тэ эн ворс, ставыс кö няйт!

— Да тэнад синмыд аслад няйт узьöмыдла... Мун первой мыссы! Мед оз кут веравны!..

— Да тайö нö мый ещö?! Мый тэ горзан ме вылö? Ме тэныд мам али абу? Ой, эн дзикöдз скöрмöд менö, Макс! — дирижёр моз кинас öвтчис Анжелика Вениаминовна. — Бара ворота пыдди портфельыд вöли? Ой-ой-ой! Бать-мамыс сылы кöмкот-паськöм ньöбалöны, портфель быд во выльöс ньöбöны, а сийö...

— Öти-кö, ми портфеляс эгö чужъялöй... Мöд-кö, портфельсö ньöбис бать, а эн тэ! Коймöд-кö, тэ ме моз жö бать сыли вылын пукалан — сийö тэнö вердö-юкталö, кöмöдö-пасьтöдö...

— Ланьт, яндысьтöм син!

— Кык син костад уна-ö яндзим төрö...

— Мый, мый шуин, сötана рöд?! Кытысь татшöм кывъяссö кывлин? — тиралана гөлöсөн горзис Анжелика Вениаминовна.

— Кытысь? Тэнсьыд. Ачыд жö батылы век тадзи горзан, кор сийö тэнö янöдö...

— Ланьт нин! — друг раммыштiс Анжелика Вениаминовна. — Ме эськö, колökö, важөн нин мунi уджавны, да вот тэнö колö быдтыны-воспитайтны... Тэ вöсна омöля сёя, омöля узя...

Аслас ичötик жырйысь бөр петiс бабыс, мелiа шуис:

— Максим, бур пи, мыйла нö быдөнкöд тшетшкöдчан? Öни жö кор мамыдлысь прöща...

— А мый, верма, — веськодя вочавидзис Максим.

— А то чужан лун кежлад МАГ-тö ог ньöб, — вашмунiс Анжелика Вениаминовна.

Максим дышпырысь чеччис диван вылысь да катла-сигтыр, локтiс мамыс дорö.

— Прöстит, — нурбыльтiс вомгорулас.

— Важөн эськö медтадзи, — пиыслысь юрсö малалiгтыр, шуö Анжелика Вениаминовна. — Мун мыссы да сёй... Сэсса пуксы да урокъястö вöч... Ставсö кö вöчан бура, кино вылö денъга сета.

— Ладнө, мамуля! Ставсö вöча бура...

Бабыс вердiс-юкталiс внуксö, сэсся пуксис диван вылö видзöдны телевизор. Максим локтiс бабыс дорö. Мелiа ниртыштчигмоз шуис:

— Бабуля, ме неуна тшöтш видзöдышта тэкöд...

— А урокыд?..

— Удита, талун эз уна сетны. Мультиксö меным быть колö видзöдны.

Анжелика Вениаминовна дорö локтiс суседка-пöдругаыс да мый йылысь кö вель дыр вашкöдчисны. Пöдругаыс мунiс час мысти кымын. Анжелика Вениаминовна сöмын сэки казялiс, мый Макс абу на пуксыылöма вöчны урокьяссö.

— Макс, пиук, вöчышт нин урокьястö,— пиыслы мелiа шуö мамыс.

Максим дышпырысь чеччис да довгис аслас жырйö.

— Бабуля! А бабуля! Кöни менам "Физика" учебникыс?— пызан сайсянь горзö Максим.— Войдöрлун ме сийöс диван вылö кольли. Бара кытчöкö дзебин?

— А тэ эн шыблав, кытчö оз ков... Сы вылö тэныд ньöбöма этажерка... Мöдысь кежлö сэтчö и тэчав! Гөгөрвоин?

— Гөгөрвои... Но öни сёрниыс оз мун этажерка йылысь... Менам "Физика" абу! Кöни сийö?

Бабыс öчкисö вештö ныр вылысь да мунö этажерка дорö корсьны "Физика".

— Со тэнад "Физикаыд"... На, велöд!

— А "Математика" кöни?— бара горöдiс Максим.

Керкаын лоис чöv-лөнъ. Бабыс нёровтчис диван вылö шойччыштны. Коли минут вит-квайт. Максим клоп пöдлалiс "Физикасö", вештiс бокö да горöдiс:

— Мамуля, мамуля, ме петала пальöдчыштны?

— Сэк костi вöчин нин али мый став уроктö?

— Вöчи, дерт.

— Сiдзкö, вайлы дневниктö,— корис Анжелика Вениаминовна.

— Абу... Менам сийö вошöма либö школаö кольöма.

— Ме жö сэысь нин шули, мый учителясыд ньöти оз

төждысьны ті вöсна... Вот ме норася директорыдлы...

— Збыль... Оз öд и төждысьны... Дневникыс öд уналөн абу... Норасьны и колö, мед директор петкөдлас налы пуж.

— Дерт жö петкөдлас, — эскөдö писö Анжелика Вениаминовна. — Вот лоас бать-мамлөн собрание, ставсö висьтала...

Максим чöv олö. Сійö дөвöлен аснас. Ставыс лои бур, — думайтö сійö.

Сэки коридорын кыліс звөнök шы. Пырис Максимлөн батыс, Ардальон Никитич да сылөн другыс Лука Иванович. Найö уджалöны öтлаын. Кыкнанныс гажайсь. Гöтырыслөн синнас юалöм вылö, Ардальон Никитич висьтасис:

— Вöлім футбол вылын... Сэсся буфетö пыралім, — лыддьöдліс Ардальон Никитич. Зепсьыс перйис доз да пунктис гöгрöс пызан вылö.

— Анжелика Вениаминовна, муса ань, вайышт миянлы мыйкö вомö суйыштны. Со ми Лука Ивановичкөд тыртчыштім.

Анжелика Вениаминовна петіс кухняö, а Максим уськөдчис ывлаö: доз кө вайисны, позьö час-мөд смела гуляйтны...

Дасөд часын нин Максим кыліс восьса öшинь форточкасянныс мамыслысь гөлөссö:

— Макс, волы пырав гортö. Зэв ёна колан.

— Мый лоис? — пырöм бöрас кашкигтыр юалис Максим.

— Нинöм эз ло, — шуис батыс. — Лок, картіасьыштам. Ми мамыдкөд, а Лука Ивановичлөн пöлыс абу.

Максим картіасис бура, велалöма нин. Лука Ивановичыскөд найö батысö да мамсö дасысь кымын кольлісны дуракөн.

— Молодеч, Макс! — ошкыштіс батыс. — Юр вемыд зэлыд, уджалö.

А кор помалисны картіасьöм, Анжелика Вениаминовна бара кутіс кевмысьны:

— Макс, муса пи, зёлота ёкмыль, пуксы да урокъясто помав...

— Мамуля, ме талун мудзи нин...

— Вот тэныд и на... Ардальон, а Ардальон!— Анжелика Вениаминовна кевмысьо-норасьо верёсыслы.— Ме сылы көсьи деньга сетны и сеті... А сійо көсьиыс урокъяс вöчны и эз вöч...

Батьыс довкйöдлö журнас: "Ай-ай-ай!", но Максим тöдö нин, батьыс оз скöрав. Мөдарö, батьыс нимкодьясьо аслас пиöн. Максим пуксис батьыс дорö, ая-пия пöся сёрнитöны футбол йылысь, торъя ворсысьяс йылысь.

— Макс, дыш абу дыш, а уроктö ковмас помавны,— бара пондiс тевгыны мамыс.

— Да, ковмас, Макс,— содтiс батьыс.

Максим юрсö öшöдöмөн бөр мунiс аслас жырйö да пуксис пызан сайö. Восьтiс задачник. Эз на коль и минута, горöдiс:

— Пап, папуля!..

— Мый нин лоис?

— Волы, пöжалуйста, отсышт!..

— Мый отсавны?

— Да, задачаыс оз пет.

— Век тэнад оз пет... Думайтны колö... Юрыд нö мый вылö?

— Условиесö, буракö, дзугöма.

— Дзугöма кө, дерт, оз артмы... Вайлы, инö, видзöдла,— Ардальон Никитич пырис Макс дiнö.— Мый нö, көнi? Кутшöм задача?

— Да, со этайö,— чуньнас чуткис книга лист бокö Максим.

— Да-да-да,— лыддис сійö.— Видзöд, кызди ме вöча. Первой со тадз: умножитам... Сэсья вот тадз эсiйöс чинтам, сэсья эта вылö юкам. Видзöдлы öтветсö. Лöсьялö?

— Ой, папуля! Тэ жö молодец! Лöсьялö ставыс...

— Думайтны колö журнад, пиук.

— Папуля, тэ жö инженер, быдтор кужан!..— батьсö ошкыштiс Макс.

Ардальон Никитич пинас вöли дөвöль, и, мөдарö, пиыс

батьнас вöлі дөвöль... Сэсся кыкнанныс пуксисны теле-
визор дорö.

Аски рытнас, кор Ардальон Никитич локтіс гортас, Анжелика Вениаминовна пыригас на кутіс норасыны сылы:

— Тöдан, Арик, мый? Школасянь звöнитліс Макслөн классной руководительницаыс... Куим записка пö нин ыстылім, корлім тиянөс школаö...

— Ме некутшөм записка эг аддзыв,— вочавидзис Ардальон Никитич.

— Ме, ме эг жö аддзыв... Двойкаыс уна да дневниксö пö косялөма... Велöдчö пö лёка... Хулиганитö... Да ещö шуис, лёка пö воспитайтанныд,— лыддьöдліс Анжелика Вениаминовна.— Ми лёка воспитайтам? Сылөн эм аслас комната. Став учебникыс эм. Пыр деньга сеталам кино вылö... Куимөн лелькуйтам сійöс... Вот тайö да... Лёка пö воспитайтанныд? Да колö жö думыштны тайöс... Но ме тадз тайöс ог коль. Аски жö директорыслы жалöба гижа. Мед велöдыштасны сійöс... татшөм "руководительницасö"...

Этшсыс петөм Анжелика Вениаминовна некыдз оз вермы öвсыны.

А Максим сійö каднас бара чужъяліс футбол.

1980. с. Межадор

ШАШКИ

Висьт

Б атьöй менö велöдіс шашкиөн ворсны. Рытъяснас ми частö ворслім сыкөд. Но мыйлакö сійö век менö вермыліс. Гожөмнас миян сиктö бабыс дорö локтіс гөститны суседкалөн внукуыс. Ми сыкөд тöдмасим. Шуöны сійöс вöлі Тимаөн. Öтчыд сійö локтіс ми ордö да менам пызан вылысь аддзис шашки.

— Тэ шашкиөн ворсан, Миша?— юалис сійö.

— Ми батькөд ворсам да век вермыла сійөс,— ошйысьышти ме.

— Ме ворса жө, но менам шашкитө вунөма босьтны...— жугыля шуис сійө,— вай ворсны партия-мөд...

Ми пуксим ворсны. Ворсім өти партия,— ме ворсси, мөдөс — ворсси. Тадзи өтпырйө витысь ворсси.

— Тырмас!— шуи ме, весиг юрөй висьмис. Ме петі ывлаө, Тима ме бөрся.

— Төдан мый, Мишка?!— друг шуис сійө.— Вай вежсям-а?..

Ме эг гөгөрво,— шензяна видзөдлі сы вылө.— Мыйөн вежсям?— юалі сылысь.

— Шашкинад... Менам гортын эм да ёна нин важ... Со ме тэныд кутшөм перочиннөй пурт сета... Аддзан? Кык пурта, шылаа, отверткаа, весиг вилка эм... А тэ меным шашкитө...

Меным шашкиыс жаль, выль на сійө,— неважөн на бать ньөбис. Ме эг сөгласитчы. Меным окота лои ещө ворсны ськөд да быть вермыны сійөс. Ме шуи сылы:

— Вай ещө ворсам, а?..

Миян кильчө дорө чукөртчөмаөсь нин челядь, быттө найөс кодкө нарошнө корөма татчө...

Ми заводитім ворсны. Ворсім вит партия. Нинөм он шу: ме көсйи вермыны, а витнан партиясө бара ворсси... И ворсси челядь дырйи! Чайтанныд, кутшөм меным?!

Ме чукөрті шашкиөс да пыри керкаө. Тима муніс гортас. Ме сэтшөма скөрми и шуи сэсса некор не ворсны шашкиөн.

Но рытнас век жө менам мунсис Тима дорө да шуа сылы:

— Чөрту, шашкинад и ставнас. Вай вежсям...

Тималы нимкодь, нюмъялө, вөзйө меным перочиннөй пурт, ичөтик лупа стеклө, часі чеп... Перочиннөй пуртыс менам эм, правда, абу сы кодь, но эм. А лупанас мый вөчны?

Тима гөгөрвоис, мый меным оз кажитчыны вөзйөмторьясыс да шуис:

— Төдан, Миша, тэ көсьян, мед ме челядь дырйи

ворсси тэныд? Ме нарошнө кута сетчыны, а?

— Давай,— нимкодь лои меным.— Ворсам дас партия!

— Дас кө и дас!— шуис Тима.

И ми вежсим: ме сылы сеті пашки, а сійө меным перочиннөй пурт...

Аскинас ме дорө локтисны челядь, нуөдөны купайтчыны.

— Энлы, ребята, эн тэрмасьөй. Ме пырала Тима дорө. Ме пыри Тима ордө.

— Петам, Тима,— шуа сылы,— ворсыштам пашкинад... сөмын тэ сетчы меным, отсав вермыны...

Тима докнитис юрнас, босьтис менсьым пашкиөс, и петім челядь дорө, ывлаө. Ми заводитім ворсны, миянөс кытшалисны челядь. Меным челядь отсалөны,— то өти ход висьталөны, то мөдөс. И друг өти ходөн ме сөйи Тималысь сразу нель пашки. Со кызд! Сэки Тима шуис, мый ворссис. Мөд партияын Тима вөчис сөмын на сизим ход, а менам вөлі нин дамка. Тадзи ме выиграйті вит партия да видзөдлі челядь ылө. Челядь вомнысө паськөдөмөн видзөдісны ме ылө.

Ми заводитім ворсны квайтөд партия.Өні меным некод нин эз висьтавлы, кутшөм ход колө вөчны. Өні найө отсасисны Тималы. А сійө зумыша чөв оліс. Ме верми ещө кык партия!

— Коді ещө көсйө мекөд ворсны?!— шуи челядьды да чеччи.

Шуны кө нин веськыда, челядь ме моз жө ворсисны омөля, и өні некод на пиысь эз смелмөдчы ворсны мекөд.

Ми Тимакөд заводитім ворсны өкмысөд партия, и сэки ме куті думайтны, мый ме збыльысь куті ворсны бура. Ме перйи зептысь Тималысь перочиннөй пуртсө да шуи сылы:

— На, Тимофей, бөр босьт асьыд пурттө... Ме ог нин көсйы вежсыны... Ме сідз өні тэысь бурджыка ворса...

— Тэ мый, Мишка? Йөймин?— шөпнитис Тима.— Ми жө тэкөд сёрнитчим...

— Ог вежсы и ставыс. Ме жө тэысь өні бурджыка ворса!.. Тэч пашкисө, ворсам медбөрьяысь...

Тима нинѳм эз шу, тэчис шашкисѳ да кутім ворсны...
И дас ходѳн сѳйс менсьым став шашкияссѳ.

1990.

КОДИ БАКВАЛЫС?

Висьт

К атя баб дорѳ Сыктывкарысь воис сылѳн Денис
внукыс. Ми, челядь чукѳр, регыд тѳдмасим
сыкѳд, и кутім ѳтлаын ворсны, лэччывны Ми-
зин дорѳ купайтчыны.

Меным сійѳ эз кажитчы, век мыйѳнкѳ ошйысьѳ,
быттѳѳкѳ медся уна тѳдѳ. Шуны кѳ, став баквалъяс
пиысь медся баквал. А ошйысьліс быдторйѳн, — мый сійѳ
карын медся джуджыд керкаас олѳ, мый карын уна
автомашина, мый сылѳн батыс частѳ командировкаѳ
ветлѳ Москваѳ, мый сылѳн эм уна рѳма телевизор, и
телефон, и ичѳтик болонка пон, и кань да сідз водзѳ.

Ме терпитны ог вермы баквалъястѳ, кодъяс дугдывтѳг
ошйысьѳны. ѳтчыд ми челядькѳд сѳрнитчим и шуим
сійѳс "велѳдыштны", янѳдны... Шуим вѳчны сідзи: ме
пана Денискѳд сѳрни. Сійѳ, кыдзи и век, заводитас
мыйѳнкѳ баквалитны, ошйысьны. Сэки ме лэпта весь-
кыд кийс, и менам знак серти челядь кутасны кинас
клопайтны да горзыны "баквал — ыкша, баквал —
ыкша!"

— А сійѳ кѳ талун оз кут ошйысьны? Кутам жѳ
горзыны? — юалис Васька-рыжик. Тадзи сійѳс гѳрд юрси
вѳснаыс шуисны.

— Кутас, — шуи ме. — Баквалъяс век ыкшасьѳны, лун
и вой.

— Денис, лок пет мачасьны, — горѳдіс Васька-рыжик.

Денис пыр жѳ петіс да шуис:

— Лыддя вѳлі зэв интереснѳй книга. Шусьѳ "Робинзон
Крузо". Ой, сэтшѳм интереснѳй!

Ми челядькѳд пуксялім ѳшинь ув потшѳс вылѳ. Сійѳ
миян дорын сулалѳ...

— Ёна тай! Интересной книгаыд уна... Ме вот лыддя "Фантомас", а тэ сійос синнад эн аддзыв.

Денис нинөм эз шу, чөв оліс.

— Ошйысян, мый олан Сыктывкарын,— водзö нуөді ме.— Сыктывкарыд абу ылын... А вот менам вокöй олö Мурманскын... Сідзöд, ребята? Да ещö ветлөдлө океанскöй пароход вылын, и ме чөв ола. А Мурманскыд дас пöv ылынджык Сыктывкарсяныд...

Денис, тыдалö, эз виччысь татшөм сёрнисö да неуна шöйöвошикодь. А ме водзö кути атакуйтны сійос:— Батыд, шуан, Москваö ветлывлö,— нери ме сійос.— А менам дед война дырйи Берлинöдз волöма. Тöдан, кымын орден да медаль сылөн? А тэнад батыдлөн абу пöди? Вернö, ребята?— бара шыаси челядь дорö.

Челядь довкйöдлöны юрнас: вернö пö! А ме водзö:

— Аддзöмыд тай пон, кутшөмкö "болванка!" А вот миян спаниель вöлі, вöлі уткатö кутас да гортö вайö. А тэ шуан.

Челядь кывзöны, нюмъялöны, но нинөм оз шуны.

— Сэтшөм понйыс оз овлы, мед уткаяс куталис,— эз эскы Денис.

— А вот и овлö,— шыасис тшөтш Гена.— Педөр дядълөн Тайгаыс весиг тар вайліс...

— Ог тöд, — бара на эз эскы Денис.

— Он тöд... Ме аслам синъясөн аддзылі да,— эз лэдзчысь Гена.

— Ладнö, поннад и ставнас. А вот тэ шуан, тиян пö кань эм? А кутшөм?

— Кузь гөна, сибирскöй рөд...

— Э-э...— горөді ме,— "сибирскöй"... А миян вöлі сиамскöй. Вернö, Лиза? Дзик.тигр кодь!

— Оз вермы лоны тигр кодь каньыс?!— вочавидзис Денис.

— Да, да... Вот и овлö... Налөн бокыс визьбсь, збыль дзик тигр кодь. Сöмын ичöt,— отсалис меным Лиза. Челядь серөктисны. Ме гөгөрвои, мый челядь ме дор сулалöны, ме ещö на ышмышті. Шуи Денислы:

— А телевизорыд öні быдөнлөн эм. Босьтö не сöмын

Сыктывкар, но и Москва... Сідзкө, телевизорнад эн ошйысь!.. А менам эм компас... А чужан лун кежлө бать ньобас мопед...

— Збыль?— горөдіс Васька-рыжик.— А мем сетлан катайтчыны?

— А мем, мем?— кутісны горзыны челядь.

— Мыйла буретш тiянлы?— скөрмис Васька-рыжик.— Менам сійө друг, и насянь медматын ола...

— Ладнө, энө шумитөй, ставныдлы сетла...— өлөді челядьөс да видзөдлі на вылө. Найө нюмъялөны. Сійө сетіс меным выль вын да бара куті "атакуйтны" Денисөс.

— Шуан, телефон эм? Мед эм кө. Бур. Миян Иван дядьлөн эм жө... Но мый сыысь? Бать кө тшөктас, миянө аски жө пыртасны...

Денис мыйкө көсйис шуны, но ме вомалі, эг лэдз:

— И ещө... Ме тэысь быдса арөсөн ыджыд... и век лоа ыджыдджык... Ме ставсө тэысь водзджык кута вөчны... Лыддысьны и гижны. Быдма да лоа министрөн...

Сэсса челядьлы ме петкөдлі знак, лэпті веськыд киөс. Найө кутісны клопайтны да горзыны:

— Ыкша — баквал! Баквал — ыкша!

Ме сэки видзөдлі на вылө да чуйми. Найө видзөдлісны эз Денис вылө, а ме вылө.

Ме чуйми... Мый нө, баквалыс ме али мый?

1990

ВУГРАСЬНЫ МУНИГӨН...

Висът

Федя вуграсьны векджык лэччывлө Мизин дорө веськыда пода туйөд. Талун мыйлакө мөдөдчис мөдлаті. Муніс грезд помөдзыс, а сэні туйыс кежө шуйгавылө, мунө муяс пөлөн да петкөдө паськыд луд вылө. Сэтысянь юыс зэв нин матын. Тайө туйөдыс Федя эз радейт ветлыны. Эз радейт сы вөсна, мый сикт помас оліс Витя Кутькин, кальөг вома

детинка. Сылөн вөлі ас кодъыс жö кальöг пон. Сійö көть эз вöв бульдог, либö овчарка, а прöстö ичöтик дворняжка, Витя кутіс сійöс чеп йылын. Кор Федя муно на дорті, понмыс век матыстчö потшöс дорас, лапасö лэптö шөр потш вылас да лёкыс заводитö эргыны-увтчыны. Сэки сэтчö матыстчö сылөн көзяиныс да горöдö:

— Эй, рыбак, розя бак! Талун тэ со мый ыждаөс кыян!— сійö кабыртö веськыд кулаксö да водз да шөр чунь костöдыс петкөдлö певсö — фигу, ачыс гораа сералö...

Федя оз кывзы сылысь больгöмсö, тэрыба восьлалö, весиг оз видзöдлы Витя вылö. Сылы некор, тэрмасьö. А кор Федя кутас бөр локны гортас, Витя тöдöмысь, кызди и век, бара юалас:

— Эй, Федя-редя, Мизинас чериыс коли на?

Тадзи сійö век юасьö, кор Федялы нинöм оз шед. А кытысь сійö тöдö, мый чериыс оз шед? А черитöгыс Федя волывлö частö. Сідзи нин артмö: талун шедас, а аски оз...

Но талун луныс вөлі мича. Абу тöла. Чериыс, колö чайтны, кутас сёйны. Федя прöйдитіс Кутькинъяс дорті. Кузь вугыр шатсьö вештіс мөд пельпом вылас да кежис шуйгавылö. Кузь му бокин водзын мургис трактор. Федя локтіс туй вежöдыс, коді нуис ю дорö, но сэтчö эз кеж, а мөдöдчис трактор дорö. Сылы колö вөлі öктыны нидзувъяс. А öктыліс сійö выльөн лэптöм бөрөздасьыс.

Федя чеччаліс лэптöм му пластъяс вивті, веськөдчис тракторлань. Трактористнас вөлі Петя дядьыс, мамыслөн ичөтджык вокыс. Дядьыс оліс накөд орччөн.

Важиник трактор, сьöкыда ружтігтыр, ньöжйöник кыссис му мөдар помлань. Тракторлөн шыыс частö оръясьліс, то гораа мурöстліс, то заводитіс "несьявны", то дзикöдз ланьтліс, сэсся бара мурöстліс да кыссьыліс водзö. Гөрöм му вылас чеччалісны сьöd ракаяс: корсисны нидзувъяс. Федя му комөкъясөн кутіс лыйлыны найöс, вөтлыны му вивсьыс.

Трактор локтіс Федя дорöдз да сувтіс. Петя дядьыс петіс кабинасьыс.

— Мыйкö менам старик талун дурны кутіс, — Федялы

норасис тракторист.— Свечаясыс, буракö, тшыксьомаось...

Сійö лэптис моторыслысь капотсö: сэтысянь öвтыштис жарөн.

— А талун колö вöли помавны тайö мусö...— водзö сёрнитис тракторист.

Дядьыс перйис свечаяссö, чышкалис кос рузумөн, видзöдлис найöс, сэсся шуис:

— Э-э-э! Лёк делöйс вөлöма!..

Öти свеча вöли потöма, а запаснойыс эськö эм, но ключьясыс абуось. Тöрыт гортас мотоцикл разявлис, ключьяссö босьтлис тракторыслысь, и вунöма гортас.

Федя жалитыштис Петя дядьсö, гыжйыштис балябöжсö. Сійö бура гөгөрвоис, дядьыслөн делöясыс лёкось, но отсавны сійö нинöмөн эз вермы. Тракторсьыс сійö нинём оз гөгөрво, школаын эз на велöдны. А вуграсьём кузя кö? Сійö, дерт, отсалис эськö пыр жö. Шуам, кутшöм черилы мый самавны?.. Ёкыш радейтö кузь нидзув, а сынпиян радейтöны пучöй. Федя тöдö весиг, Мизинын кöни кутшöм чери сёйö.

— Но, племяш, мый кутам вöчны?— Юалис Петя дядь.

— Ме ог тöд,— ышловзис Федя.— Школаын ми тракторсö эг на велöдöй...

Петя дядь видлалис мукöд свечаяссö, сэсся бергöдчис Федялань да шуис сылы:

— Со мый, Федя-редя... Вугыр шатинтö татчö коль, а ачyd котöртлы миянö гортö...

— Мыйла?

— Менам сарайын, верстак, вылын эм пу ящик... А сэни бокас эм кык ключ. Видзöд: со кутшöмось... Öтиыслөн бокас гижöма № 14, а мöдыслөн — № 17. Отсав меным, другö... Котöртлы да вай найöс. Вуграсьны тэ аски верман, а гөрны колö меным талун...

Петя дядь кутис чышкавны дзöнь свечаяссö, а Федя пöрччис сумкасö, пунктис сійöс гусеница вылас, а ачыс уськöдчис грездö.

...Свеча. Ичöтик и эм, а мыйта выныс... Петя дядь чышкалис тшöтш вильяссö, сэсся бөр пункталис местаясас,

йитіс магнето проводъяссө, сэсса заводной ручкасө бергөдыштис гоз-мөдысь. Трактор "несийс" некымынысь, гораа сярөбтис, сэсса өтмоза заводитис мургыны.

— Окота кө лои, пуксыы кабинаө,— Федяөс корис дядьыс.

Сийөс кыкысь корны эз ковмы. Пуксис. Мөдөдчисны. Вөчисны өти кытш, мөдөс...

— Рулитнысө сьөкыд?— юалис Федя.

— Окота?— гөгөрвоис Петя дядьыс.

— Дерт жө окота!— вочавидзис Федя.

— Вот мунам помөдзыс и сета тэныд бергөдчыны...

Со и муыслөн пом. Петя дядь кыскыштис провод, кодөс нюжөдөма плугвывса автоматөдз. Плуг зэлөдчис, кыпөдис муысь югьялысь амысьяссө. Трактор быттө лэчкысь мыні,— тэрыба тьувөдис эжа вывти.

— Вот тайө рычагсө кыскыштан,— кежас веськыд-вылө, а тайөс — шуйгавылө,— Федяөс велөдис дядьыс.— Пуксыы ме местаө...

Федя сатшкысис рычагьясө, а ачыс видзөдө водзө.

— Бергөд нин!— горзө дядьыс.— Бергөд шуйгавылө!..

Федя кыскыштис асланьыс рычагсө. Трактор быттө джөмдыштліс да бергөдчис гусеница вылас.

— Эн чорыда, тэрмасьтөг!— горөдис дядьыс.— А өні шуйганас!..

Федя кыскыштис шуйга рычагсө, трактор бергөдчис шуйгавылас. Петя дядь ачыс кутчысис рычагьясас.

— Татчө уна вын оз ков! Висьтав рычагнас кытчө мунны, сэтчө и мунас.

Му помас Петя дядьыс шуис Федялы:

— Мун сэсса вугрась, черитө кый!..

— А сетан ещө бергөдчыны?

— Көсьян кө сета...

...Федя талун сідзи и эз көтөдлы вугырсө, но гортас муніс шуда, нюмъялігтыр.

Кор локтис Витя Кутькин керка дорөдз, кыліс, кызди чепнас зильөдчигтыр, понмыс локтис потшөс дорөдз да заводитис эргыны. Сэтчө жө локтис и көзяиныс, Витя.

— Эй, рыбак — потём бак! Мизинас чериыс коли на? А-а-а... Тэ, буракё, нырнад му гөрөмыд?

Федя, дерт, гөгөрвоис, мый нырыс сылөн съод, Петя дядыслөн моз жё, но эз дорйысь, а ньөжйөнник шуис:

— Гөри, но эг нырөн, а плугйөн...

— Плугйөн! Ха-ха-ха! Нырнад, а не плугйөн.— Витя гораа сералис, а понмыс гораа увтчис.

Федя тшапа мунис на дорти, весиг эз видзөдлы на вылө... Сійө вөлі шуда...

НЕМКО

Висът.

Челядь кытыськө вайисны грездө понпи. Сійө вөлі мисьтөминик: ыджыд юра, дженьыдик вөсни кокъяса. Сувтса гөныс не то рыжөй, не то руд. Гырдемөм синъясыс вералисны виж рөмөн. Но челядь ворсисны ськөд, котрөдлісны мудзтөдзыс, а вой кежлас йөртлісны Борялы кильчө пос улас. Кор челядь разөдчисны, Боря пыралис гортас да петкөдіс понпилы важ тасьтён нянь крөшка и йөв. Понпи, виньдалігтыр, азыма сөйис да нюжөдчис бок вылас. Понпи эз на сетлы гөлөссө, эз увтчы, ни эз никсы. Буракё, ёна мудзөма. Аскинас бара жө сійө — челядь котралисны, ворсисны ськөд.

Колө шуны, челядь оз жалитны понлы сөянсө. Вердісны век пөттөдзыс, бура. Вайлісны юква и яя шыд, рок, жаритөм картофель, нянь, весиг уль яй кусөкъяс. И вежон кык мысти төдчис нин, мый сійө быдмыштіс, гөныс шыляліс, весиг лөставны кутіс. Лоис гажаджык, и заводитіс весиг ачыс вильшасьны.

Мый өд сылы, понпидлы? Асывнас челядь вердасны, и сійө лун-лун бергалө на дорын, котралө накөд, быттөкө тшөтш ворсө футболөн, весиг купайтчө накөд. Көдкө кө өбөдитліс сійөс, понпи вешйыліс бокө да жугыля видзөдліс челядь вылө. Но регыд мысти сылөн вунліс

өбидасы да бөр матыстчывліс челядь дорө да ышмывліс
важсясыс ёнджыка, көть шы некор эз сетлы.

Понпи мыйлакө оз увтчыв, ни оз эргыв. Тыдалө,
яндысис мукөд понъясыс аслас мисьтөмлун вөсна, оліс
дзик немөй моз. Та вөсна челядь кутісны шуны сійөс
Немкоөн. Немко вөлі рам. Радейтісны сійөс не сөмын
челядь, но и кодсюрө гырысыс пиысь. Найө век
адзылісны сылы мелі кыв, а корсюрө сетлісны сылы
кампет, сакар тор, булка тор либө көлач.

Арнас челядь мунісны школаө. Немколы өтнаслы лоис
гажтөм. Гоз-мөдысь вөтчывліс челядь бөрся, но мукөд
грездса понъяс вөтывлісны бөр. Та вөсна челядь бөрся
мунны эз лысьт, а ветлөдліс аслас грездөд, көні мукөд
понъяс эз вөвны. Частө воывліс чой горулө да видзөдіс
выліас, кытысянь мыччысьлөны челядь. Кор вөлі
аддзас найөс, сійө уськөдчывліс налы воча.

Сійө арнас Боря мам ордө ылі войвыв карысь воис
гөститны мамыслөн ичөтджык вокыс гөтырыскөд да
нөль арөса нывкакөд. Мамыслөн вокыс, Петя дядь,
гортас прамөя оз и воы, лун и вой колляліс вөрын да
берег дорын. Ангелина, гөтырыс, пөшти эз петавлы
керкасыс, век нуөдіс верөссө өдйөджык бөр мунны
гортас. Кор Боря вөлі школаын, нывка өтнасөн гуляйтіс
өшинь улын, ворсіс Немкокөд. Мамыс сөмын корсюрө
петавліс видзөдлыны сійөс. Кыдзкө өтчид Ангелина
петіс кильчө бокө да жаляддза көсйис малыштны Немкоөс.
Нюжөдіс кисө, кытысь паркйис чорыд духи дук. Немко
кыліс дуксө, бергөдчис мөдарө да гораа несйис. Лэччис
пос вылысь, лэптис бөрья шуйга коксө да көсйис...
көтөдыштны мусө. Ангелина, дерт, терпитны тайөс эз
вермы, пузис да скөрысь чужйис Немколы. Немко чилөстіс
(вөлисти гөлөсыс петіс) да котөртіс керка пельөсө да
сэтысянь бугжыля видзөдліс тешкодь нывбаба вылө.
Нывка кутіс бөр чуксавны сійөс: "Немко, Немко! Лок ме
дінө!" Но Немко матыстчыны нывбаба дырйи сы дінө эз
лысьт. Нывка бөрддзис да пырис керкаас.

Кор челядь гортынөсь, гажтөмыд оз босьт. Век нин

кодкө да Немко дінын. А кор школаынось? Сылы гажтөм, ворсны некодкөд.

...Асывсяньыс буситіс посни зэр. Зэригад ывлаті он котрав. Нывка петіс да пуксис кильчө пос вылө. Чукөстіс ас дорас Немкоос. Понпи эз ыждав, локтіс нывка дорө. Легнитіс бөжнас да пельяссө топөдөмөн меліа видзөдліс нывка вылө. Нывка кутіс малавны сійөс. И Немко пуктіс нывлы пидзөс вылө юрсө. Тадзи найөс и суис Ангелина, нывкалөн мамыс. Сійө вөлі югыдлөз плаща. Киас кутіс японскөй зонтик. Буракө, мөдөдчөма лавкаө.

— Мам, а мам, видзөд... — көсйис мыйкө шуны нывка, но эз удит. Мамыс лёкысь горөдіс. Немко повзис да сувтіс кок йылас, но эз пышйы. Сійө мыжапырысь, но эскана видзөдліс нывбаба вылө, коді вөлі зонтика кисө лэптөма вылө, медым кучкыны Немколы. Немко асьсө эз лыдды мыжаөн. Эз виччысь, мый сылы кучкасны. И сәки нывбаба мый вынсьыс зонтичнас швачкөбтіс понйыслы өтчид, мөдысь... Лэптис нин кисө коймөдысь, но кучкыны эз нин удит. Немко чеччыштис да пышйис керка пельөс сайө, а нывка гораа бөрддзис.

Немко муніс. Сылы паныдасис Боря, коді вөлі локтө школаысь. Боря гораа чуксалис, но Немко муртса сувтыштліс, здук кежлө юрсө бергөдліс Борялань да видзөдліс сы вылө. Но матыстчыны эз матыстчы. Буракө, ёна өбөдитчис. Бөрья веськыд кок вылас чөтігтыр, сійө котөртис водзө... Кытчө? Код төдас?

Сійөс сәсся некор нин эз аддзывны грездысь. Сөмын челядь дыр на казтылісны сійөс.

УСТЯ

Висът

Гоёмнас Юля пөдругаясыскөд кайліс ягө чөдлач вотны и локтігас вайис нэриник пыстапи. Сійө вөлі слаб, сувтса гөна, — қоньөрөй, буракө, усьөма позсьыс да ёна нин тшыгьялөма. Юля мыйлакө кутіс шуны сійөс Устяөн, гожөмбыд дөзёритіс,

вердіс-юкталіс, и арнас ичөтик Устяыд лоис пөрнөй мича пыстаён. Юрас — съод шапка, а съылісяньыс виж морөсөдзыс лэччө съод визь—галстук. Веськыд кокас Юля гартіс пас пыдди гөрд шөвк сунис,—аддза кө пө кытыськө ывлаысь мед ме пыр жө төда Устяөс. Йөз дінө велаліс өдйө, ньөти эз кут повны наысь. Горөдас вөлі Юля: "Устя! Устя!",—сійө лэбө сы дінө да пуксьө сылы пельпомас, юр вылас, либө нюжөдөм ки вылас. Восьса өшиньод сійө частө петавліс ывлаө, но недыр мысти бөр воліс гортө. Аръявылыс сійө кутіс вошласьны пыр частөджык, буракө, маті вөрысь аддзис асьыс рөдвужсө. Сэссия өти лунө и дзыкөдз воши, эз лок гортө. Юля, дерт, шогсьө, муртса оз бөрд. Но нинөм он вөч. Тадзи воши миян Устяным.

Арыс вөлі кузь, мича, дыр эз лымъяв, да лымъялөм бөрас эз сразу көдздөд. Көдзыдыс дзенөбтіс коркө декабрь шөрын кымын.

Асывнас ме чеччи водз. Комнатаөс төлөдыштөм мөгысь ме осьті өшинь форточка да кухняө петі чай юны. Көдзыдысла талун посни классъясөс оз велөдны, и Юля вөлі гортын. Пызан вылын дзужгис самөвар, и ми пуксим ськөд чай юны. Пукалам, чөсмасям оз варенъеа чайөн, варовитам өттор-мөдтор йылысь, и друг кыла: көнкө кодкө жбыркнитіс и занавессайса сөр вылын кыліс төдса: "Пинь! Пинь! Пинь! Пинь!" Ми кыкнанным чуй-мим, мый тайө? Ме чеччи да вешті занавессө, и Юля пыр жө горөдіс: "Да тайө жө миян Устяным!" Да, збыль вөлі Устя! Гашкө, сійө мый дыра нин виччысис?! Пурга вөлі да форточкасө кык-куим лун нин эг осьтыв.

Вот тадзи бөр воис Устя. Но сійө эз вөв важ мозыс збой, поліс матыстчыны весиг Юля дорө. Важ местаас кухняө, өшиньдорса стенө, вөчи ичөтик джадж, Устялы сөянін. Юля пуктіс сэтчө кык блюд,—өтиас кисьтіс проса шьдөс, мөдас—йөв. Ме петі аслам комнатаө да пукси уджавны. Юля ноксис мыйкө книгагас видзан шкап дорын. Час мысти кымын петім видзөдлыны, мый нин вөчө миян гөстяным. Шьдөстө сійө абу и вөрзьөдлөма, зато пызан вылысь съөд нянь шөрөм пөшти ставнас кокалөма, сөмын

коркаыс кольёма. Ковмис меным ветлыны лавкао да ньобны зор пыдос,—гожёмнас сійос зэв бура сёйис. Сыысь кындзи, сійо ёна радейтліс семечки. Пуктан дозъяс, регыдён лукъяс, сёмын кышыс лэбё отарёмодарё. Устя регыд мысти бөр велалі ми дорё. Юля луннас школаын, а ме пукся пызан сайё уджавны, а Устя быттьё сәні и вёлёма. Пуксяс пызан вылө меным воча да дзоргө-видзодө ме вылө. Кор дозмас пукавнысё, лэбашыштас комнататі, да пуксыылас то менам юр вылө, то пельпом вылө да горөдлас ассыыс: "Пины! Пинь!" Ещө отитор ме казялі сылысь: радейтис вөтлысьны төрөканъяс бөрся. Аддзас сійос кутшөмкө пельөсысь—лэбө нин сэтчө.

Вот таdzi и оліс төвбыд. Кор көдзыдыс личалыштис, ме нарощнө восьтывлі форточка, но мунны сійө некытчө эз мун. Ошинь улын жбыръялыштас, гашкө, пөдругаясыскөд аддзөдчылас, сәсся пуксяс форточка дорышө да сьылө ассыыс песнясө, а гашкө, пөдругаяссө корө пырны керкаө. Пукалыштас сәні, и бөр лэбас аслас местаө. Комнатаас кык өшинь костын менам вөлі книжнөй шкап, а весьтас стенас тувъялі шыльыд бедь,—сәні сійө и узыліс. Керкаын шоньд, кынөмыс пөт,—мый не овны сылы?!

Локтис тулыс. Ывлаыс шондөдіс, кутис нин төпөдны войтва. Ывлаын гораммис гөлөсыс пышкайяслөн. И Устя вежсис, кутис нервничайтны, чирзыны не аслас гөлөсөн, скөравны, частө матыстчивны форточка дорө. Ме, дерт, пыр жө гөгөрвои лэбачлысь төждлунсө. Ме восьті форточка, сійө пуксис дорышас да горөдіс: "Пинь! Пинь!" Буракө, прөщайтчис мекөд... и лэбис. Колис мыйкө дыра кад, но сійө эз вунөд "төвся квартирасө", корскөрө вольвліс. Пуксяс вөлі форточка дорышө, либө өшинь курич вылө да сьылө: не то пөвсө корө, не то мыйкө ещө. А керкаө сәсся эз нин пырав.

А, гашкө, төвнас бара локтас? Код төдас!

ЧӨРТЫС ДЗУГИС...

Висьт

Челядь ставён ворсісны ывлаын, коді мачён, коді дзебсясьомён. А ме пукалі őшинь дорын да велөді урокъяс. Ой, кутшөм гажтөм пукавны да дольны: кыкысь кык—нель, кыкысь кум—квайт. Друг восьса őшиньод ылькнитіс төв да ворсөдчыны кутіс тетрадь листъясөн. Сэссия сійө дөрөм воротник сайө пырис да кутіс сьыліөс гильөдны.

—Мый сибдін ме дорө, скөрмөдчан!—горөді ме... —Он аддзы, мый ме велөда урокъяс, ог эшты...

А сійө бара ылькнитіс да шутөвтис пель дорын.

—Вешйы, мися, ме дорысь... Мун пет да ывлаас шутьяля!—шуи ме да ки пыдөсөн тупки пельөс.

А сійө мөд пель дорө матыстчис да морт гөлөсөн шөпкөдө:

—Лок петам ывлаас... Панласьыштам...

—Панласьны? Тайөс позьө... Вай панъясям!—шуи ме.—Лок пет!..

Сійө бөр петіс őшиньод да горөдіс:

—Вөтөд менө!..

Ме чеччышті жө őшиньод да котөрөн сы бөрся. Ме котөрта сы бөрся, а сійө сералө да горзө:

—Эн коль! Суөд менө, суөд!..

Сыкөд панласиг, тадзи ми воим вөр дорөдз... И сійө друг воши. Ме пыри вөрас. Сэні чөв-лөнь... Кытчөкө воши, дзебсис али мый?

—Эй, кытчө тэ вошин? Лок пет! Ми жө ог дзебсясьомён ворсөй, а панласям!

Корси пуяс сайысь, некөн некод абу!..

Ме пукси пу бокө да думайта: абу лөсьыд тадзтө ворсны! Ме вот муні гортысь, а туйсө бөр аддза ог? Урокъяс бара эг велөд... А учительница өмөй эскас, мый ставсьыс мыжа төв! Чөртыс дзугис менө.

ОЗЪЯ ЙӨВ

Висьт

Гожся мелі шонді югөръясыс малыштисны Маша-лысь чужомсö, и сійö садьмис. Люба да Аня чойясыс узисны на, а Митя вокыс понпикöд ноксис кильчö помын.

—Коді көсйö мекöд талун оз вотны ветлыны?—гораа юалис Маша.

—Ме, ме!—синъяссö тилигмоз шыасисны чойясыс.

—И ме тшöтш муна тiянкöд,—керкаас пыригмоз шыасис Митя.

Маша быдöнлы сетис дозмук: кодлы көрт кружка, кодлы кыз стöкан, а ачыс босьтис нэйджыд көрзина.

Гораа варовитигтыр петисны керкаысь, игналисны кильчöсö да мөдöдчисны ягö. Медводзын Шарикыскöд котöртö Митя, тыртöм стöканыс дөрöм улас сöмын брунöдö рушкуас... Ой, уна и сійö вотас талун ягöдтö. А вотöсыд таво уна, сöмын вот да вот!..

Ягын воисны нейджыд эрд вылö, ставöн разöдчисны сэтчö. А озйыс мыйта! Ставыс певпом кодь ыдждаöсь, гөрдöсь, быттö нарoшнö кисьталöма сэтчö.

—Маша, Маша, видзöд мыйта тани!—горзö Митя, а ачыс синнас кытшлалö, кутшöм тусь вомас суйны. Ок и чöскыд озйыс!

Куим чой зiля вотчöны. Кодлөн дозйыс тырö, котöртöны Маша дiнö да кисьтöны сылы көрзинаас.

—Менам бара нин кружкай тыри!—горзö Люба.

—Менам тыри жö,—тшöтш горöдис Аня.

Куим чой гораа сёрнитöны, сьылöны, ещö на зiля вотчöны... Сöмын Митя чöv олö, быттö вомас ва босьтöма. Стöкан пыдöсас гöглясьö куим оз тусь.

—Кöни тэнад вотöсыд?—юалöны чойясыс.

Митя чöv олö, тыртöм стöкансö дзебö мышкас. "Тяв, тяв!"—увтчö Шарик, дорйö Митяöс.

—Энлöй, энлöй,—шуö Митя,—ме тi дорысь унджык на вота...

Митя муніс на дорысь ылөджык, кутіс корсьысьны: көнөсь ті, гырысь тусьяс? Локтөй ме дорө!..

Ветлөдлө Митя местаысь местаө, өктө-вотө, а стөканыс век на тыртөм, сэні сөмын куим тусь. Кор сійө оз тусьсө босьтас киас, көсйө эськө стөканас пуктыны, но найө веськалөны вомас...

—Тэнад, буракө, стөканыд розя...—сералө Люба.

—Зато рушку-туисыс пьдөстөм,—содтө Аня...

—Он кө кут вотчыны, гортад өти тусь он аддзыв!—шуө сылы Маша.—Эн виччысь!

—Ладнө! Ме тані пөттөдз сёя!

Вотчө эськө Митя, но став ягөдыс вомас веськалө. Дөзмис да стөкансө бөр суйис дөрөм улас.

Люба да Аня некымынысь нин кисьтілісны вотөссө Машалы көрзинаас. Машалөн көрзинаыс сьөктаммис. Ещө стөкан, ещө кружка,—и чукийөн лоө.

—Тырмас!—горөдіс Маша.—Мөдім гортө...

Челядь котөртөны гортас. Налы нимкодь, любө.

Гортас Маша ректіс вотөссө ыджыд тасьтіө, көбрегсьыс вайис йөв да кисьтіс сэтчө...

Пуксисны куим чой пызан сайө. Босьтісны паньяс. Видлісны: ок и чөскыд озъя йөлыс! Митя тшөтш босьтіс пань да тшөтш пуксьө пызан сайө.

—Энлы, энлы, дышпоз!—горөдісны чойясыс.—Көні тэнад ягөдыд?

Чойясыс панясьөны, чөсмасьөны озъя йөлөн.

Митя пукалө бокын, бугжыля видзөдө на вылө. Мөдыс кежлө эн вунөд: мый вотан, сійөс и сёян!

СДАЧА

Висът

Петя тушанас көть и ичөт, но ветліс нин первой классө, кужис нин артавны сёөдз. Өтчюд батыс, тракторист, гортас локтіс обедайтны да тшөктіс Петялы котөртлыны лавкаө няньла. Петя зіля ветліс да вайис чөлпан нянь. Ачыс рад, нюмъялө.

—Пап, а пап! Меным сдачасө унджык сетіс... Со видзөдлы!..

Батыс видзөдліс. Вузасысь сдачасө сетөма збыль унджык, быдса кызь көпейка.

—Өні сійө менам, менам!—Петя гораа горзіс да чеччаліс кок пөв йылас.—Муна да сы вылө ньөба ирис... Да, папа?

—Колө кө ньөб,—шуис батыс.—Ирисыд, дерт, чөскыд... Но өд ме вузасысьсө төда. Сійө, Катя тьотка, сылөн эм кык нывка... Өтиыс тэ кодь кымын жө... Сідзкө, Катя тьоткаыс вештысяс миян няньысь аслас деньгаөн, да нывкаясыслы оз ньөб ирис.

Тадзи шуис Петялөн батыс, а ачыс муніс удж вылө. А Петя колис гортас, неуна ещө ворсісны каньпиыскөд, сэсса дугдіс. Рытнас, кор батыс локтіс удж вылысь, Петя дыр майшасис, мыйкө көсйис шуны батыслы, сідзи и нинөм эз шу. Водісны узьны, а оз узьсы, век син водзас вөлі кызь көпейкаа деньгаыс.

Аски асывнас сійө матыстчис батыс дорө да негораа шуис:

—Вай ме ветла няньыдла. Сдачасө колө бөр сетны...

КОРТОМ ГОСТЬ

Висытьяс.
Ывлавыв серпасьяс.
Мойдыяс.



КОДЛЫ КӨНІ БУРДЖЫК ОВНЫ...

Висът

Ывлаыс букыд. Шлапкө-усьö кос лым. Вöрын лөнъ. Гыöртöм кыз пу вылын пукалö Катша да китшкө-норасьö пöрысь Ракалы:

—Кутшöм нö тайö олöм?! Сөйны ни юны пöттöдз он вермы. Кöдзыд, частö тöла овлö, он и шонавлы, век кынман... Чöскыда узьны он вермы, весиг он вöтасьлы... Ок, бöб ме, бöб! Мыйла ме мукöд лэбачьяскöд эг лэбзы шоньдinas?..

Пöрысь Рака чöv оліс, терпитіс Катшалысь больгöмсö, кор терпеньöыс быри, ачыс шыасис:

—Код вылö нö норасян, кикимора? Тэнö тай лэбачьяс мудерөн шуöны, а тэ збыль вöлöмыд бöб... Окота кö, мед колöкö лэбин шоньд муас. Тэнö, буракö, некод эз кут...—шуалис Рака да лэбис кытчöкö аслас могөн.

—Сійö и лёкыс, мый эг лэб. Сэні, шуöны, ёна шоньд, сөяныд мыйта колö. Шуны кö, курорт...

—Эн сөр, больгысь вом! Овны позьö быдлаын бура, пöттöдз сөйны, сöмын эн дышöдчы... А сөяныд и тані тырмö, слава богу!—коз пу вывсянь шыасис кодкö.

—Видзöдтö, кодкö менö, Катшаöс, велöдö, кызди да көні овны... А тэ коді ачыл сэтшöм сюсьыс?

—Ме? Да, тöдан менö... Быд во ме тані тövья, тундраысь курортавны татчö вола... Юалан, коді ме? Ме—Еджыд Сюзь... Менö тані став зверь-пöткаыс тöдöны...

—А... Тэныд, гашкö, и лöсьыд...

—Мыйла сöмын меным? Тундраысь татчö локтісны унаөн, кыз тэ шуан, курортавны... Со аддзан, пукалöны да сералöны тэ вылын гөрд морöса Жоньяс, Байдög, Юрсикай, весиг ичöтик Еджыдкай...

—Ме некыз ог гөгөрво тиянös,—эз лэдзчысь Катша.—Мыйла сы ылнасяныс локны татчö? Тиян, сэні тундраад,—лым, и тані—лым. Сэні—кöдзыд, и

тані—көдзыд!.. Тожө "курорт" аддзөмыд!..—зывөка сөдзөдіс-шуис Катша.

—Дугды, Катша, эн янөд асьтө!—ярскөба шыасис Жонь.—Шуан ставыс өткодь? А вот и абу... Тані и лымйыс этшаджык, и көдзыдыс абу сэтшөм чорыд... Весиг турөбыс абу тундраын кодь... А сөяныд? Майбыр, тані уна. Меным, шуам, медся бурыс свет вылас ош льөм...

—А пелысьсө вунөдін? Ок, мыйта сійө!—содтіс Юрсикай.

—Да-да... Сідз, чойө, сідз!.. Ош льөмыс да пелысьсыс, другө, ёна чөскыдджыкөсь тэнад бананъяс дорысь...

—Вернө,—лым пиысь петіс да сёрниас тшөтш пырис Еджыд Байдөг. Тані уна кызд пу, бадь пу... Налөн гаръясыс чөскыдсьыс чөскыдөсь... Вот ме пөттөдз кокала найөс и лым пиө пыра. Сэні небыд, шоныд, абу төла... Мыйла абу курорт?

—Нинөм шуны, тані позьө бура овны,—бара шыасис Еджыд Сюзь. Тундраад өд ставыс тыри лымйөн, а тані эмөсь и шыръяс, и көчъяс. Позьө, позьө тані овны...—кыв көрталіс Еджыд Сюзь.

Катша кывзис-кывзис да и шуө:

—Ме тадзи быдөнлы норася, а, вөлөмкө, ачым курортын ола... Тешкодь!..

—Тэ, Катша, шоныд муяс йылысь эн шогсьы, эн жалит... Да и аслад слабиник бордъяснад эськө эн во шоныд муөдзыс. Бурджык нин тані миянкөд курортась.

Вөрын бара лои лөнь. Катша мыйкө дыра кезлө такалыштіс. Найө ставөн разөдчисны сөян корсьны...



ПЫШКАЙ

Висьт

Ы влаын йиркакылö кöдзыд, гашкö, нелямын градус сайö. Руа. Талун сиктын лöнь, сöмын машинаяс жургыштасны,— мунöны асланыс мөгөн. Ме тэрыба локта совхоз контораысь. Матыстча нин горт дорö. Видзöда, туй вылын кокасыöны пышкайяс, корсыöны сёян. Ме локті на дорö, ставöн жбыр лэбисны, а öти коли, куйлö туй вылас. Копыртчи сы дорö. Видзöда: ловъя на, синъясыс жугыля видзöдисны ме вылö. Босьті киö. "Мый лои тэкöд, коньöрушкаöй!" Видзöда, ставыс быттöкö лючки-ладнö, кокъясыс дзоньöсь, бордъясыс местаас, абу чегöмаöсь, вомас зөр тусь кутö. "Век жö мый лои тэкöд",— мöвпала. Пышкай куйлö ки пыдöс вылын, оз вөр, оз тракйысь. Сöмын синсö гöгрöдлö... Ме пöлышті сы вылö пöсь лов шыön. Сэсся суйи пась питшöгö да мөдöдчи гортö, мися, пырта керкаö да мед шонтысьыштас. Кильчö пос дорын нин кыла: пышкайыд кутіс вөрны питшöгын. Пөрччи кепысьöс да босьті киö, сэсся рази киöс. Пышкайыд друг тракнитчис да полігтыр, быттö велöдчö на, лэбис. Пуксис куст ув вылö, но мыні сэтысь да уси лым вылас. Ме бөр матыстчи сы дорö, нюжöді киöс, но... Сійö, буракö, чукöртіс вынъяссö да лэбис кыз ув вылö. Пукалыштіс сэні, чеччалыштіс увйысь увйö да горöдіс чуксасыны: "Чик-чирик, чик-чирик!.." Аддза, менам другöй бөр ловзис,— тыдалö, кöдзыдыс чорыда топöдлöма сійöс.

Час джын мысти ме нарошнö петалі видзöдлыны, эз-ö усь кыз пу вывсьыс менам тöдсаöй. Видзöдлі гөгөр: некön абу, некön оз чирзы. Тыдалö лэбöма пöдругаяс дінас.

Со öд, уна-ö колыштö ичöтик лэбачыдлы шоныдыс, медым бөр ловзыны да бөр заводитны сывны: "Чик-чирик!"

АСЛАС ПРӨСЕК

Висът

Ш ондіа мича лун. Ме муна важ прөсекөд. Таті гожом-арнас йөзыс ветлөны вотчыны. Öнi татi некод оз ветлөдлы, ни подөн, ни машинаөн. Муна ньөжйөнник, любуйтча ывла выв мичлуннас. Неуна мунышта да сувта, видзөда гөгөр. А прөсек пөлөныс сулалөны гөрд сера пожөмъяс, дзор тошка козъяс. Көнсюрө на костө писькөдчөмаөсь кузь пипуяс,—видзөдлан йылас—шапкаыд усьө.

Бара сувтi, видзөда... Со прөсек вылас төдчө кутшөмкө кок туй. Кодлөн нө тайö? Көч—абу көч, руч—абу руч!.. Видзөдлі шуйгавылө, сэсся—веськыдвылө... А, со мый вөлөма! Кок туйыс заводитчө со пожөм дорсянь. Вуджө прөсексө да бөр вошө коз пу дорын. Да тайö жө ур ветлөдлөма! Көні öнi сийө ачыс? Видзөда пуяс вылө, некөн нинөм оз вөр. Но сийө, мудерыд, дерт, көнкө сәні да видзөдө ме вылө. Көні тэ, вильышпоз?! Көні да кутшөм тэнад, ичөтик пельк пемөсөй, аслад прөсекуд?

Майбыр, тэнад туйөд некод оз ветлөдлы. Сөмын тэ ачыд төдан ассыд туйтө. Сидзкө, шуда бур туй тэныд, пельк да сюсь пемөсөй!

АДДЗЫСЬЛЫТӨДЗ!

Висът

Т өвнад шондiыд дзик гөсть кодь: петавлас и бөр вошө. Зато лэдзө видзөдны ас вылас. Асывнас петан кильчө вылө да аддзан, кызди Гөрчак гөра сайсянь кодкө ньөжйөнник гөгыльтө ыджыд ыргөн таз. Быттө сөмын на дорөмаөсь кузнечаын да петкөдлөны йөзыслы. Сәні жө, енэжас, еджыд тшын гартчө, быттө важ кос турун сотөны. Но сийө абу тшын, а еджыд кымөр пласт. Окота горөдны: шондi-матуш, гөгыльтчышт өдийөнджык. Но сийө оз тэрмась—воис

медся джуджыд пожом весьтөдз, майшасьштис сәни и воши. Быттьо пожом емъясас сутшкысис, обидитчис да дзебсис кымөръяс сайо.

Лосьыд водз асылын шөйтны вöрын. Ме муна паськыд прөсекөд. Отар-модарас сулалөны пашкыр пожомъяс, дзор козьяс, пипуяс, ловпуяс, чолөмася накөд. Петі нейджыд эрд вылө. Дзик шөрас орччөн сулалөны кык кыз пу. Лымйыс еджыд и найо еджыдось, —синтө ёрө. Пучеръясыс абу прөстө еджыдось, а съод сераось, быттьо еджыд пу вылас кодкө беринъяс коялөма. А гожөмнас, көнкө, кутшөм гажа тані? Сулала да любуйтча наөн. Окота горөдны налы—энө чөв олөй, гажөдчыштөй! Но кутшөм өні гажөдчөм?! Оз өд найо небыд му да веж турун вылын сулавны, а коскөдзыс лым пиын. Юр весьтаныс абу мелі шөнді, а улө өшйөм скөр букыд енөж.

Сулалөны ота-мөдыслы воча да варовитөны, —кадыс, майбыр, налы тырмө. Мый йылысь? Код төдас... Гашкө, кык пөдруга норасьөны көдзыдыс вылө, бушкала чизыр төв вылө, коді корсюрө лөкысь уськөдчывлө на вылө, гашкө, зверь-пөтка йылысь, кодъяс волөны эрд вылас, гашкө, мөвпалөны выль тулыс да шөныд гожөм йылысь.

Эн шөгсьөй, мича аканъяс. Ставыс бөр лоө, кужөй виччысьны. Тулыснас ме бара на вола тиянөс видлыны. Аддзысьлытөдз!

ЭЗ КЫНМЫ!

Висьт

Микол дядькөд ми паныдасим Ыджыд ягын. Сійө лөсышталіс пуясө кутшөмкө пасъяс, а ме ветлөдлі фотоапаратөн да мыйсюрө снимайталі. Лун шөр бөрын кымын ме мөдөдчи гортлань, а Микол дядь муніс водзө. Ме вуджи ыджыд туй, сәсся бөр пыри вöрас да пукси пашкыр пожом улө куритчыны. Вöрын лөнь, төв чир абу. Друг мыйкө кышақылыштис и менам юр вылө шнөпкысис лым комөк. Лымйыс пырис сьыліө, воротник сайо. Б-р-р-р... Кутшөм

көдзыд!.. Коді сәні вильшасьө. Час, видзөдла... Чеччи да вешйи бокодджык. Видзөда пожомыс вылө, сингьясөн корся, коді вильшасьө. И друг кыла, быттьө кодкө гитаралысь вөсни струнасө вөрзьөдіс: "Ти-и-и-нь!.."—Адззи өд: пыста! Чеччалө увыйсь увыө. Пожөм кольяссө тракйө, кыйдыссө корсьө.

Со коді вөлөм ме вылө лымсө койө!

—Но, другө, аттьө! Төвсө колльөдін, эн кынмы? Но и бур, водзө ов да гажөд йөзсө.

Лэбач нинөм эз вочавидз, ноксис ас местаас, корсис кынөмпөт, быттьөкө ме эг вөв сәні да видзөд сы вылө.

БӨРДӨ КЫДЗ ПУ

Висьт

Кузь төвся ун бөрын вөр вочасөн садьмө, ловзьө быд пу. Му пытшкысь пыдысь налөн вужъясыс босьтөны ас пытшкас ва. Тувсов ваыс, сокыс, вир моз жө, кайө пучер кузяыс вылө, пырө увьясас, юктөдө сәні аснас гаръяссө, и найө вочасөн польдчөны,—вот потасны да мыччысясны нәри-ник веж коръяс.

Коркө, өти тувсов лунө, ме ветлөдлі вөрті. Вөрыс вөлі лымъя на, а кушинъясын да вөр дорас лымйыс сылөма нин. Гортө петігөн нин вөр дорсьыс кылі керасьөм шы.

"Интереснө, коді тані керасьө?—думыпті ме.—Татысь жө пессө керавны оз позь"... Ме мөдөдчи сылань, но регыд мысти керасьөм шыыс дугдіс кывны, лои лөнь. Туй кузя ме петі вөр дорөдзыс, но сәні некод эз вөв.

Ме сувті, гөгөр видзөдлі и дзик туй боксьыс адззи мича, ён кыз пу. Пашкыр увьяссө лышкыда павкнитөма. Кодыр корьяссяс, мича и пу лоө, видзөд да сөмын любуйтчы.

Матыстчи сы дорө да чуйми: пуыс бөрдіс кыз синваөн. Пучерас дөввидзис ыджыд еджыд тшупөд,—кодлөнкө кыыс лыбөма керавны пусө сьөлөмөдзыс. Ыджыд ранасьыс пучер гөгөрыс шорысь моз тюрис-лэччис синва кодь

югыд зарава. Видзодлі вывлань, сук увьясас петомаоьс гёрдов-лөз уна-уна гарьяс. "Найө таво оз нин потны, пуыс оз нин корьясь"...—думышти. Сійө сокыс, кодї эськө юкталіс гарьяссө, өні ковтөг, весьшөрө визувтө муас. Пуыс вочасөн косьмас да кулө. А медым быдтыны татшөм пусө, колө комын-нелямын во. Кодлөн кыис лыбис вөчны татшөм лекторсө? Збыль өмөй сы ради, медым нылыштны гоз-мөдыс ловзьөдчыс васө? Зэв жаль!..

ТУВСОВ ВОЙЫН

Висьт

Рөмыд. Тувсов шондї саяліс вөртас сайө. Ме пукала лыс чомйын да юа чай. Друг ме весьтын кутіс шувгыны. Думышти: уткаяс лэбөны. Видзөдлі: сідзи и эм. Сыктыв весьті улїті лэбө утка кельөб. Со сійө кежис Кузь тыө да пуксис сэтчө шойччыны. На пиысь, гашкө, кодьяскө кольччисны татчө, кодьяскө лэбасны водзө. Сыктыв век на туө, ю шөр визулас корсюрө петкөдчылөны на йи пластьяс. Ме көсйи нин водны, но бара кылі енэжсьыс шувгөм шы. Видзөдлі: тайө пөрийө лэбисны дзодзөгьяс. Ме чайті, мися миянын дзодзөгьяс бырисны нин, а найө, вөлөмкө, эмөсь на. Ме видзөдї на бөрся. Налөн кельөбыс мыйлакө торьялі кык пельө: өти чукөр лэбис водзө, войвывлань, а мөдыс, дзодзөг кызь кымын, пуксис менам чомсянө неылө лыа бөжө. Көнкө, видзьяс вылын, горзісны куликьяс, берег дорас чивзісны каляяс. Но вочасөн ставыс лөнис, сөмын шувгис Сыктыв, ворсөдчис бөрья йиторьясөн.

Колис, гашкө, час-мөд. Кадыс матыстчис войшөр кадлань. Дзодзөгьяс спокойнөя шойччисны кодзыд лыа вылын. Сөмын өти, буракө, вожакыс эз узь. Сійө сулаліс то өти кок пөв йылас, то мөд вылас, нюжөдлывліс сьылісө, видзөдлывліс гөгөр, да бара заводитіс вугравны.

Югыдлөз енэжас сярвидзисны уна-уна кодзувьяс.

Петі чомйысь, видзодлі гөгөр. Друг ме казялі: берег дорас кустьяс пиын кодкө вөрө. Кутшөмкө пемөс, көнкө, узымдчө, думышти. Друг сэтысянь ещө дзирдыштіс быттьө кык кодзув, и бөр вошины. Пөрысь дзодзөг, буракө, казяліс жө сійөс, да синсө вештывтөг видзөдіс сылань. Сылөн унмыс быттьө абу и вөлөма. Но кустьяс пиын өні некод эз тыдав. Дзодзөг такалыштіс да бөр заводитіс вугравны.

Кык виж кодзув бара мыччысисны, но матынджык нин. Өні, тыдалө, и дзодзөг гөгөрвоис, мый кык виж чутыс абу енэжса кодь кодзувьяс.

—Га-га-га-га!—горөдіс дзодзөг-вожак. Сійө жө здукас ставөн садьмисны да кутісны кыпөдчыны.

—Га-га-га-га!—гораа юрөбтіс тувсов рөмыдас дзодзөглөн повзём гөлөсыс, кор кык виж чут уськөдчис на вылө.

Дзодзөгьяс удитісны кыпөдчыны сынөдө. А сәні, көні найө вөліны, исасигтыр гөграліс руч. Дзодзөгьяслөн гөлөсыс пыр ылысмис и ылысмис, сәсся эз кут кывны.

Асывнас ме ветлі сэтчө. Руч, дерт, эз нин вөв, но туйыс кольөма. Кустьяс дорсянь сійө кыссьөма; а кор матысмөма дзодзөгьяс дорө, кузя чеччалөма, но... абу судзөма.

...Асыввылын пөртмасис кыа.



РӨЗБОЙНИК

Висът

Т улысыс воис водз, лымйыс сыліс өдйө, сөмын көнсюрө кольёмаось лестукъясөн. Вежон кык сайын нин воисны съод ракаяс, на бөрын и мукөд посни лэбачъяс. Менам сарай өдзөс карнизын вөлі лэбач поз. Сійөс кольөм тулыс вөчисны да гожйисны сәні чыкыш пара. Но таво мыйлакө эз овмөдчыны, — ме нин думайтi, мый накөд мыйкө лои да некор нин оз локны татчө.

Но найө век жө воисны. Воисны водз асылө, кор шондiыс муртса на чургөдчыштiс Гөрчак гөра сайсынь да мича алөй краскаөн мавтыштiс мусө да енэжсө. Чыкышьяс лэбалiсны керка гөгөр да гораа чирзiсны-горзiсны.

Ме пукалi кильчө лабичын да аддзылi, кызди тайө лэбач чукөрсъыс торйөдчис первой өти, сәсся мөд лэбач. Найө уськөдчисны важ поз дорас, но эз пуксыны сэтчө, а лэбисны бөр...

Ме думыштi, мыйкө мися неладнө сәні. Важ поз дорас найө матыстчылісны өтчид, мөдысь, коймөдысь... И быд пөрийө гораа чирзiгтыр вешйылісны бөр. Недыр мысти на дiнө өтлаасисны и мукөд чыкышьяс. Найө өти бөрся мөд лэбалiсны кытшөн да тювлiсны поз дорас кызди пикирующөй самолётъяс да горзiгтыр бөр вешйылісны бокө.

Ме дыр эг гөгөрво, мыйла найө оз пуксыны поэяс либө поз дорас, а кытшлалiсны сәні? Мыйла найө кыпөдiсны та ыджа шумсө? Ме вель дыр следитi на бөрся. Недыр мысти важ поз өтар-мөдарас век жө пуксисны кык чыкыш. И сәки поз пытшъыс мыччысис лэбач юр. Вот дивөйд! Вөлөмкө, джуджыд чыкыш поэяс пукалө пышкай. Вот рөзбойникыд! Кор чыкышьяс матыстчылісны поз дорас, пышкай кыпөдліс юрсө да вомсө паськыда восьтөмөн бергөдліс өтарө-мөдарө, зiлис кокыштны чыкышьясөс. Сійө вомсө восьтыліс сэтшөм паськыда, мый весиг тупкысьлісны синъясыс. Сійө,

буракö, чайтис, мый паськыд вомсьыс чикышгъяс пов-
зясны, мый сійö свет вылас медстрашнöй лэбачыс!..

А чикышгъяс лэбалісны-кытшлалісны, сэсся пуксис-
ны льöм пу вылö, буракö, сёрнитчыны, мый вöчны
водзö...

Сэки пышкай петіс позсьыс да кутіс ветлöдлыны
карниз вывті öтарö-мöдарö. Сійö вөлöма пöрысь пышкай,
свтса гöна. Морöс вылас гöныс эз вöv руд, а кутшöмкö
сьöд, а юрыс дзормöма. Бöжыс абу.

Сиктын пышкайыс уна, найö стаяөн лэбалöны, а
татшöмсö аддзи первойысь. Карниз вывті ветлöдліс
ньюжйö, тшапа, юрсö лэптöмөн, быттьö некодысь повтöг
гуляйтис аслас горт дорын.

Ме öвтышті киён, повзьöді, көсйи тшöтш вöтлыны йöз
позйысь, но сійö, яндысьтöм синмыд, эз и видзöдлы ме
вылö да бөр дзуркнитис-пырис чикыш позйö.

...Асывнас ме муні районö, газет редакцияö, а бöрсö
локті рытнас нин. Керка дорын чикышгъяс эз бергавны,
кытчöкö саймовтчöмаось, вöлі лөнь. Казялі найöс аски
асывнас. Ме юи чай да петі кильчö вылö куритчыны.
Видзöда да чикышгъяс бара нин пикируйтöны позсö.
"Мыйкö сәні, буракö, лоöма!"—думышті. Öні чикышгъяс
пуксьылісны поз дорас параён, да эз лэбны сэтчöдз,
кытчöдз эз вола выль пара. Чикышгъяс лэблісны кытчöкö
сикт помлань, да волісны сәтысь öта-мöд бöрсяыс неуна
коставлöмөн. А кык лэбач пукалöны дзик поз дорас да оз
лэдзны пышкайлы лэптивны юрсö. Ме видзöда и аслам
сингъяслы ог верит: сикт помысь чикышгъяс, вөлöмкö,
вайöны воманыс сөй комökгъяс да лясöдöны позгъяс,
тупкöны петанінсö.

Чикышгъяс уджалісны зіля, дружнöя. Мыйкö дыра
мысти позсö, көні пукаліс пышкай, дзикöдз эськö туп-
кисны, но... Пышкай, колö лоны, гөгөрвоис тайöс.
Пышкай кутіс вөрны, шпорöдчыны бордгъяснас, сэсся,
буракö, чукöртис асьыс став вынсö да уськөдчис
кольыштöм на розьöдыс ортсö... Уль сөйыд абу на
удитöма ёна косьмыны,—сöмын сьавкмуні разі-пели.

Пышкай кӱсйис пышйыны, дзедьсыны чыкыштъясысь, но он на босьт! Чыкыштъяс кытшалісны сійӱс да быдӱн зільӱ кокыштны юрас. О, мый вӱчсис сӱні сынӱдас?! Пышкай зіліс лӱбны льӱм пуӱдзыс да дзедьсыны сӱтчӱ. Сідзи и лои: пышкай тьувкнитіс увъяс костас, быттӱӱ эз и вӱвлы. А чыкыштъяс, визув да пельк лӱбачьяс, кытшлалыштісны льӱм пу гӱгӱрыс, сӱсся лӱбзисны сикт сайӱ. Регыд мысти волісны бӱр, да воманыс вайлісны сӱй комӱкъяс, кос турун... Ме гӱгӱрвои, найӱ лӱблывлӱны важ кузнеча дорӱ,—сӱні эм сӱй гӱп, кытысь кӱзьяйкаяс босьтӱны сӱйсӱ пач мавтны. А тӱдса чыкыш пара ноксисны поз дорын, дзоньталісны, идралісны сійӱс. Йӱзлӱн моз жӱ налӱн асланыс вӱлі помеч. Рытнас ставӱн разӱдчалісны асланыс позъясӱ. Овмӱдчисны выльмӱдӱм позйӱ и миянлы тӱдса чыкыш пара. Вунӱдісны эз найӱ руд рӱзбойникӱс ог тӱд, но меным корсюрӱ усьлӱ сійӱ тӱд вылӱ. Со и висьт ковмис гижыштны сы йылысь.

ОЗ КӱСЙЫ ЮКСЬЫНЫ

Висьт

Ме вӱлі кая ягӱ пач лысла. Друг кыла: менам юр весьтын рака лӱкысь горзӱ. Видзӱдлі вылӱ да аддзи: ме весьтті уліті лӱбӱны кык рака. Ӑтиыс лӱбӱ лӱня, шытӱг, кызкӱ сӱкыда ӱвтчӱ бордьяснас, а мӱдыс усьласьӱ сы вылӱ да кызд вермӱ горзӱ... Со ӱтиыс пуксис матысса пожӱм вылӱ, а мӱдыс, кравзысьыс, усьласьӱ сы вылӱ да зільӱ пуксьыны сы дорӱ. Чӱв олысьыс лӱбис водзӱ, мӱдыс—сы бӱрся. Тадзи некымынысь: ӱтиыс—пышйӱ, мӱдыс горзигтыр вӱтлысьӱ сы бӱрся. Кор ме матыстчи матӱджык, то аддзи татшӱмтор. Сійӱ ракаыслӱн, коді пыштъяліс мӱдсьыс, вомас вӱлі быдса булки! Нинӱм он шу: чӱскыд сӱян! Сы вӱсна и юксьыны ӱртыскӱд оз кӱсйы!

МЫЙЛА СКВОРЕЧНИКЫН НЕКОД ОЗ ОВ?

Висьт

Ме вöчи скворечник. Мича артмис. Тувъялі сійöс потш йылö да сувтöдi амбар бокö. Воисны лунвылысь скворечьяс, но мыйлакö сэтчö эз овмöдчыны. Недыр мысти овмöдчисны сэтчö пышкай пара. Олісны гажаа, гораа сьылісны чирзісны. Гожöмнас ачым аддзылі, кызди скворечник пытшкысь петісны пышкайпиян. Но кык во мысти менсьым скворечниктö эновтісны и пышкайяс. Ме шензя, мый лоис? Шуи видлыны скворечниксö, мыйла сійöс эновтісны весиг пышкай гозъя.

Лэбачьяслысь керкасö ме косялі, и мый жö?! Сэні тырыс вöлі кутшöмсюрö клам, мыйысь найö вöчöны позсö. Сэні вöлі и кос турун, вöv гөн, лэбач гөн, быд пöлос лестукторьяс, бумагаторьяс, весиг öти шайта бумага деньга. Пышкайяс кыскалöмаöсь сы мында сэтчö, мый асьныс абу кутöмаöсь тöрны да лоöма мунны сэтысь. Ме весалі керкасö да бөр сувтöдi ас местаас. Коді öні сэтчö овмöдчас?

ВИЗЯОРДА

Висьт

Ме босьті фотоаппарат да мöдöдчи ягö. Важөн нин эз удайтчыв некутшöм зверь-пöткаöс снимайтны. Тайö пöрйö меным везитіс. Ме муна вöрса векни ордымöд да понöль бокась друг аддзи ичöтик зверöс. Тайö вöлі визяорда. Сійö мыйкö ноксис понöль дорас, буракö, сөян бөрйис. Ичöтик зверь казяліс менö да котöртіс кызд пу дорö. Сійö мунігмозыс чеччыштіс пу вылас, кöсйис кайны выліас, но эз вермы, бөр уси. Сэки сійö скöрысь шутөвтисчирöстіс да мöдысь уськöдчыліс кавшасьны пу вылас. Но и тайö пöрйö сійö эз вермы кайны пу вылас.

Ме сулала и шензя: визяорда төлка да пельк зверь, мыйла сійö оз вермы кавшасьны пу йылас? Ме сулалі сысянь неылын да трачкөді-снимаиті сійös. Коймөдысь босьтчылөм бөрын, визяорда сувтіс кык бөръя кок вылас, а воддза лапаяснас кутіс кучкавны-барабанитны аслас кыз банбокъяс. Сэки восьса вомөдыс кутісны гылавны муас кутшөмкө пу көйдысьяс, косьмом ягөдъяс. Кор рекмис вомкөтшыс, визяорда звирк-чеччыштіс да здукөн кайис кыз пу йылөдзыс. Сійö пуксис ув вылас, видзөдіс ме вылө да скөрысь шутөвтіс-чирөстіс: "Шөйтан пө кыті оз ков да кор оз ков!" Гашкө, сійö дасьтіс сөянсө пияныслы? Пу йывсьыс ме вөчи бөръя снимок да мөдөдчи водзө.

УТКА-МАМЛӨН ШОГ

Висьт

Мизин дорын нюрас гожөмбыд ноксисны мелиораторъяс, писькөдісны канаваяс. Ыджыд тракторьяслөн гораа мургөмыс шызьөдіс матігөгөрсä вөр-васө. Иван-сотчөмын дзик вөр дорас найö жө вөлі кодйөмаөсь мыйлакө гөп.

Сійö абу паськыд, но вель джуджыд. Васяньыс гөп дорышөдзыс лоө метр кымын. Öтчыд вуграсяніныс локтігөн, ми кежим Иван-сотчөмас. "Чөдлач пө вотыштам",—шуө Юля. Ми кежим сылань и буретш веськалім сійö гөп дорас. Друг сәні кутіс герчкыны утка. Кор аддзис миянөс, сійö пөлынясигтыр да герчкигтыр кутіс мунны вөрланьыс, думсьыс нуөдө миянөс бокөджык. Ме пыр жө думышті: тані мыйкө неладнө... Гашкө, позйыс тані? Ме кытшовті матігөгөр, но некутшөм поз ме эг аддзы. Друг Юля горөдіс гөп дорсяньыс:

—Воы, воы татчө! Гөптас уткапиян пөдөмаөсь...

Ме матыстчи сәтчө. Гөптас збыльысь вөлі вит кулөм уткапи, чергысьөмаөсь вывлань кокөн, бовъялөны мыш выланьыс. Ме пыр жө гөгөрвои; кор тракторьяс кутісны матыстчыны утка поз дорас, коньөр утка-мамыс нуөдіс

ассыс посни челядьсö ылöджык, вөрлань, и вот суис тані найöс неминуча. Уткапиян усьöмаöсь гöптас, а бöрсö кайны абу вермöмаöсь,—öд найö эз на лэбавны. Дыр-ö сэні вöліны? Код төдас!.. Буракö, тшыгйысла и кулöмаöсь... А коньöр мамыс сэні оліс да герчкис-корис челядьсö петны гöпсыс.

Юлякöд ми лэптім уткапиянсö да сэтчö жö и гöп дорас гуалім. Гашкö, öні мамыс такалыштас да эновтас найöс.

ТАР-МАМ

Висьт

Кыдзкö öтчыд ме ветлöдлі ягöд да воті косьтан тшак. Гортö петигөн нин ме веськалі ичöтик мыльк ылö, кöні быдмисны коз пиян, понöльяс. Ичöтик пашкыр коз пу улысь аддза мича еджыд гоб. "Босьта тайöс и пета туй ылö",—думышті ме.

Ме копыртчи да нюжöді киöс тшакыдла, и друг аддза: пу увсьыс гöгльясны кутісны сера руд комökъяс. Гöгыльтчисны и друг вошины син улысь, быттö найö эз и вöвны сэні.

Ме, дерт, пыр жö гөгөрвои, мый тайö—тарпиян, и заводиті сюся гөгөр видзöдавны, кытчö найö дзевсялісны. А-а, со кöні тэ... Öти гона гөгрöс комök гöгыльтчöма ки пыдöс пасьта гöпторйö да сайöдчöма паськыд пипу кор улö. Ме матыстчи сы дорö, тупки ки пыдöсөн, сэссия босьті киö да топöді морöс бердö. А сійö мый вынсьыс песьсö, мездысьö, ставнас тіралö.

—Эн пов, йöюк! Ме сöмын малалышта да бөр лэдза...

Но сійö менö некыдз оз кöсйы гөгөрвоны,—песьсö и песьсö.

Сэки мöд понöль улысь петіс тар-мамыс. Сійö асьсö кутіс збоа, шпорöдчис бордъяснас, сувтöдіс сорссö, сьылісьыс гөнсö да кутіс видчыны-котсыны. Ме, дерт, лэдзи писö. Тар котсігтыр пöлынтьіс-муніс ме дорысь. Ме мöдöдчи сы бöрся, но сійö лэбис.

Ме пукси мыр былө. Көнкө мясянь неылын тар бара кутіс котсыны, — ас дорас чуксаліс пиянсө.

Ме сөмын думышті: "Кыдзи мамыс повтөг дорйис челядсө!" Мамыд век мам, көть коді сійө эз вөв.

ПЕТРӨВАНЛӨН СЛАВА

Висьт

Гождомнас өшинь улын олісны өтлаын дзодзөг семья да курөгъяс. Кыкнан семьяыс быдтысисны, бать-мам бөрсяыс котралісны виж ёкмыльяс. Дзодзөг-батьыс вөлі зэв гордөй, тшап, синбөжнас зывөка видзөдлывліс курөгъяс былө. Торйөн нин сійө эз радейт Петук-Петрөванөс. Асывъяснас, кор аддзысясны өшинь улын, тшап дзодзөг весиг эз здоровайтчыв Петрөванкөд. Петрөван эз өбижайтчы сы былө, век ноксыліс аслас пөдругаяс дорын. Петук кызз Петук, нинөмөн эз торъяв сиктын мукод петукъясысь ни аслас туша-рожанас, ни сорсъяснас, ни шпорааяснас, ни мича бөжнас. Татшөмыс быд сиктын тырыс. Аддзыліс кө кутшөмкө тусь, эз жалитлы сетны сійөс пөдругаясыслы: "ко-ко-ко-ко!" — на, сөйөй. Эз радейт косясьны сосед-петукъяскөд. И, дерт нин, кор вөлі колө, век ас кадө сьөлөмяньныс чукөстліс: "ку-ка-ре-ку!"

Гашкө, тадзи төдчытөг да рама и оліс Петрөван асьыс нэмсө, но өтчыд лои өшинь улын өтитор, коді вайис Петрөванлы ыджыд слава!..

Петрөван аддзис канава дорысь нянь корка, кытыськө, буракө, Шарик вайөма да абу сөйөма. Коркаыс вөлі чорыд нин, няйтөсь, но, нинөм: позьө кокавны... Ко-ко-ко-ко! — корис ас дорас курөгъясөс.

— Га-га-га! — Петрөван кыліс дзодзөг-батьлысь гөлөссө. Петрөван лэптис юрсө да видзөдліс сылань.

— Га-га-га! — дзодзөг видіс асьыс пөдругасө. — Кымынысь ме шулі, тэ эн матыстчы няйтөсь курөгъяс дорас... Найө сэтшөм идөртөмөсь, луксьөны няйт пиын и куйөд пиын... Срам! А тэ ещө сәні челядкөд!

Петрöван весиг эз видзöдлы скөр дзодзöг-бать вылö,—тайö абу нин первойысь. Сійö кöсийс нин бөр заводитны кокавны нянь коркасö, но сэки друг лёкысь горöдiс дзодзöг-мамыс.

Петрöван сувтiс кок чунь йылас, и пыр жö гөгөрвоис, мый лой. Енэжсянь из моз тьювö-усьö на дiнö курöг-варыш. Ещö здук, и сійö кватитас дзодзöгписö, кодi вöли неуна бокынджык мукöдъяссыс. Петрöван шлапнитiс бордъяснас, горöдiс: "ку-ка-ре-ку" да уськöдчис водзö.

Öнi сöмын сійö аддзис пез рözбойниклысь пемыдвиж мышкусö. Петрöван чеччыштiс да мый вынсьыс сатшкис гыжъяссö varyшлы голяас. Сэсся бара шлапнитiс бордъяснас, чорыда-чорыда кокыштiс сылы юрас. Варыш лездiс-уси.

"Неужели ме верми сійöс?—думыштiс Петрöван.— Неужели ме вии сійöс? Дерт жö ме! Ме!"

—Ку-ка-ре-ку!—нимкодъысла горöдiс Петрöван.

Сійö лунсяныыс паськалi Петрöванлөн славаыс. Став курöгыс ещö на пыдди пуктыны кутiсны сійöс. Славасö некыдз эз вермыны кусöдны ни сосед-петукъясыс, ни мукöд. Öнi весиг тшап дзодзöг-бать мöд ногөн кутiс видзöдны сы вылö. Сійö öнi аддзас Петрöванöс да улöдз копыртчылас, пыдди пуктана шуас:

—Олан-вылан, Петрöван!



ЙӖРШ ДА СЫН

Висьт

Юр весьтын жуоны номъяс. Берегдорса эжӖр пытшкын бордъяснас шарӖдчӖны юрсигусьяс. Ю вылын лӖнь, сӖмын таб гӖгӖр котралӖны ва тӖрӖканъяс. Ва визулас ворсӖны посни черияс. Пукала час кымын нин, но чери оз сӖй, вугыр таб эз на вӖрзъыв. Берегын зӖв номйӖсь, но ме дорӖ оз матыстчывны: мавтча антикомаринӖн.

ТыртӖм бидонӖн шенасигтыр, бадь кустъяс пыр берег дорӖ лӗччис кутшӖмкӖ дядьӖ. Ме сӖйӖс ог тӖд, буракӖ, абу миян сиктысь. ПуджӖм гӖленя ыджыд резинӖвӖй сапӖга, чужӖмсӖ да сьылисӖ тупкӖма номдӖраӖн. ТӖдтӖм морт прӖйдитис ме дортӖ да сувтис воськов дас сайӖ. Менам век на эз дӖбнитлы, а сӖйӖ, кӖть сӖмын на воис, лӗптис нин ыджыдкодь сынпи.

И друг... менам табйӖй вӖйи. "Экма, сакӖс вунӖдӖ..." — думыштӖ да лӗптӖ берегӖ чаль кузя йӖрш.

Черийд кутис сӖйны збыль вылӖ. Менам табйӖй сӖдзи и вӖйласьӖ. ЛӗптӖ йӖрш, а сӖйӖ, соседыс, ыджыдкодь сын, а ме бара—йӖрш.

"Мый нӖ тайӖ, чериыс ме вылын сералӖ али мый?" — думыштӖ. ВидзӖдлӖ сосед вылӖ, окота тӖдмавны, кутшӖм сылӖн самыс. Аддза, мыйкӖ сӖйӖ курччалӖ да самалӖ еджыдӖс. Булки али сыр? ВидлӖ самавны булкиӖн, сӗсся сырӖн,—весиг йӖршыс дугдӖс сӖйны.

Час, ветла сы дорӖ, юала...

—ЧолӖм, сосед! Мый вылӖ тӖ кыйсянныд?

НинӖм эз шу, мыйкӖ гаровтис газетӖ. "ПельтӖм али мый?" — думайта.

Ме мӖдысь горӖдӖ:

—Мися, мый вылӖ кыйсян?

Газет тубрассӖ сӖйӖ сьуйис зептас пыдӖджык, сӗсся сӖмын марля пырыс сӖдзӖдӖс:

—Эн горзы, черисӖ повзӖӖдлан...—сӖйӖ нетшыштӖс

шатиносö, но эз лэпты.—Коді кызди кужö, сідзи и кыйсьö...

—Аттö!—шуи ме да кайи берегö. Сэтысь ме корси важ мыръяс да кырсь увсьыс öкталі пучöйяс. Найö ёнöсь, сөдз еджыдöсь, тшөгöсь, юрыс чорыд, виж.

Лэччи бөр аслам местаö. Самалі пучöйнад вугырöс да чöвті. Видзöда: табйöй кутіс кайны вывлань, визув паныд. Оз тракйысь, а катö вывлань, бадь кустъяс улö; сэсся вöйи. Менам сьölөмöй йирксö: "Мый шеді?" Кор ме кыски берегö ыджыдкодь сын, менам соседлөн мыні йөрш. Сэсся сылөн ещö öти йөрш мыні, зато ме лэпті нин мөд сын, воддза дорсьыс ыджыдджыкöс.

Менам сосед кутіс ваас шыблавны булкиторъяс, но найöс тракйöны посни черияс—ёсьяс, шаклейяс. Няньсö кылöдö визулыс, черияс вöтчöны сы бөрся... Ме ещö сын лэпті.

Сосед кутіс ветлөдлыны берег пөлöныс öтарö-мөдарö, мыйкө сёрнитö ачыс, буракö, видö менö. Сэсся көсийс ме дорö локны, но эз лок. Бөр сувтіс аслас местаö, гаровтіс вугыръяссö да кытчöкө муніс мөдлаö. А ме кольччи.

ЧЕРИ КЫЙЫСЬ КАНЬ

Висьт

Ме ветлі Шорсай отделениеö и гортö мөдөдчи Мизин берег пөлөн. Локті важ перевоз дорөдз и сәні син улö усины кык детинка,—найö вуграсисны. Детинкаяс дорын пукаліс ыджыд руд кань. Вугыръясыс вöліны ваын, шатинъяссö сатшкөмаось берегас, а асьныс мыйкө зэв ёна варовитöны, весиг оз видзөдлывны табъяс вылас. Челядь эз казавны, кызди ме локті берег дорас, пукси сэтчö, öзті сигарет да куті видзөдны налөн табъяс вылö. Меным интереснö вöлі тöдны, эм-ö тані чериыс. Друг öти табйыс кутіс вöйласьны, но детинкаяс оз видзөдны сы вылö, оз казавны. А каньыс, коді пукаліс на дорын, синсö вештывтөг видзөдіс

ваас. Мыйон табыс кутіс вöйласьны, каньыс чеччис, сувтöдіс бöжсö да кутіс ниртчыны öти детинкаыслы кок дорас да видзöдны на вылö. Но детинкаыслы вöлі весь-кодь, сійö нинöм эз висьтав, век на варовитісны. Сэки каньыс гораа нявöстіс. Детинка, буракö, гөгөрвоис "сигналсö", тэрыба кватитіс шатинсö да лэптіс нейджыд кельчи. Сэсся мездіс черисö вугырсьыс да шыбитіс каньыслы. Сійö мурзігтыр сөйис черисö да бара сувтіс аслас пост вылö—видзöдны табьяс вылö.

КОРТÖМ ГÖСЬТ

Висьт

Арыс таво вöлі мича, кос. Гашкö, сы вöсна и тшак-вотöсыс вöлі этша. Öтчыд, кутшöмкö шойччан лунö, локтіс карысь менам важся другöй да шуö: —Тшактö, пöди, уна нин солалін? —Уна не уна, а мыйтакö мында солалі и косьті.

Тэныд тырмас-и...

—А тöдан мый?—друг вежис сёрнисö Андрей.—Вай войколөн кайлам Мизин йылö ком вугравны. Поводдяыс мича...

Ме, дерт жö, эг öткажитчы. Мизин йылас во-мöд нин эгö кайлöй. Андрей петіс аслас "жигуль" дорас, а ме сөвті ноп. И час джын мысти ми вöлім нин туйын. Лун шөр гөгөр вöлім места вылас.

Машинасö колим туй бокас, а асьным босьтім вугыр шатиньяс да лэччим берег дорас. Ветлöдлім берег пöлöныс, корсим бурджык места, но быдлаын вöлі öткодь и бөр локтім воддза местаас, машина дорö матöджык.

Вуграсим вель дыр, вежлалім местаяс, но мыйлакö талун комыс эз ворс, омöля босьтö да ёна мынласьö. Босьтны кутіс сöмын рытьявылыс. Ми другкöд лэптім нин весьтса кузьджык комын кымын чери.

—Тырмас талун кежлö,—шуис Андрей.—Аски бара

луныс воас... Вай, другё, тэ биась да пусы, а ме кытшовта матігёгөр вёртыс.

Сійо машинасыс босьтис ружье, кёрзина да муніс, а ме берег дорас биаси. Регыд мысти вёлі нин дась комыс юква, чай. Лёсьоді "пызан",—шёралі нянь, перйи нопйыс лук, сов, переч, чай юны восьті сук йёв консерв банка. Бокёдзык, мыр вылө, пукті транзисторной приёмник, "Маяк" сетө вёлі концерт. Дженьыда шуны, обед вылө вёлі ставыс дась.

А Андрей век на абу. Сійос виччысигмоз, ме бөр лэччи берег дорас да заводиті вуграсьны. Чериыс век на босьтис. Гоз-мөдөс ме шыбиті нин берегө. Ме сідз ылалі комнад, мый эг сразу кыв берег дорын кодлыськө ноксьом. И друг ме бергөдчи, и юрсійо менам сувтіс: бипур дорын көзайничайтіс ыджыд ош. Сійө пөрөдома ведра, көні вёлі кыйөм чериыс, унджыксө сөйөма, сөмын өткымын туплясисны бокин. Няньсө мыйлако абу сөйөма, а банкаыс нюлө вёлі юмов сук йёв.

Повзьөмысла ме пыри ваас (шуд вылө юыс абу джуджыд) да көсья горөдны, но гөлөсөй вошөма, оз пет. Ас көсьытөг ме копыртчылі да васьыс перйи кулак кодь из да мыйлако лыйи сійос опкыслы, но эз веськав, ош дорөдзыс изйыс эз во. Пармаса көзьяин сэки видзөдліс ме вылө, нюлыштис вом дорьяссө да матыстчис приемник дорө, кысянь кыліс музыка. "Мыйся ещө дивө тайө?"—думыштис көнкө сійө. Сэсся видзчысьөмөн исаліс төдтөмторсө да нырнас веськалі "громкость" ручкаө. Приёмникын гора брунгис рок-музыка и ош чеччыштис чуть бокө. Сэсся сылы, бурако, лои яндзим аслас повзьөмысь, друг равөстис да лапанас сетөбтис приёмникас, да сідзи сетөбтис, мый транзисторыс, гартчигтыр, лэбис да шлөпкысис Мизин юө. Ош сулалыштис недыр, и кор гөгөрвоис, мый сылы төдтөм зывөк шыясыс оз нин кывны, мурзігтыр муніс аслас туйөд.

Регыд мысти локтіс Андрей. Кор ме висьталі лоөмтор йывсьыс, сійө сөмын сераліс. Со өд кызди овлө...

РАКАПИЯН

Висьт

Миян сиктса учитель Николай Петровичлөн керка ошинь улас сулалё кык пашкыр тополь. Найос коркё батыс на садитлёма. Пуясыс вёлины джуджыдось, пашкырось. Таво тулыснас поздысисны сэтчө съод рака пара, коть найо сиктө некор на эз вочлыны позъяссө. Съод ракаяс лун-лун ноксьоны сикт гөгöрын, муяс да градъяс вылын, но öнөдз век на быдтысьлисны матысса вöрын. Тайо параыс сиктө овмөдчисны первойөн. Позйыс налөн вөли ыджыд, кыёма посни увъясысь, а пытшкас — гөн, небыдик кос турун, ветьок. Коркё гожомнас нин кутисны чирзыны пияныс. Регыд мысти поз дорышас мыччысис нель юр. Вомнысө паськөдөмөн найо виччысисны бать-мамсяныс сёян. Колө шуны, найо горшось, сёйоны уна. Батыслы да мамыслы, медым вердны тайо аравасө, ковмас чорыда мырсыны, кыз шуласны, "бордъяссө личөдлытөг". Но öтчыд найос суис ускөттё, — рытнас эз лок на динө öти рака, то ли мамыс, то ли батыс. Эз лок сийö ни аски асывнас, ни аскомысь. Тыдалө, век жö мыйкө лои ськөд. Пияныслөн, тыдалө, ёна сюмалис кынөмыс, найо гораа горзисны-горзисны, корисны сёян. А ракалы, öтнаслы, вердны найос вөли сьöкыд.

Коркё öтчыд ракапиян, буракö, думыштісны, мый найо асьныс нин вермасны лэбзыны сёян корсьны. И уськөдчисны лэбны. Но слабиник, нэриник бордъясыс эз кутны, и куимөн шлёпкысисны муас. Öти пыр жö кулі, а кыксö гортас пыртіс Василёк, учительлөн пиыс. Найо вөлины тшыгось, эз вермыны сулавны кокъяс йылас. Василёк первойсö вердіс найос рокөн, юктөдіс йөлөн. Ракапиян эз яндысьны, эз повны—мыйөн вердіс Василёк, сийö и сёйисны. Лун дас мысти найо котралісны нин керкаас, вөтлысисны Василёк бөрся да корисны сёйны.

Сэсса Василёк другъясыскөд кутіс ваявны налы ни-

дзувъяс, лёльёяс, гагъяс, —нинёмьсь эз օткажитчыны.

Воис кад, и Василёк лэдзис найօс вօля вылօ. Но лэбачпиян эз вунօдны гортсօ, воливлісны быд лун видлыны нельօд воксօ.

И дзик на неважօн օти ыджыд да куим томиник сьօд ракаяс вօчисны Василёк керка весьтօд прօщайтчан кытш да лэбисны асланыс кельօбօ, медым чукօрօн лэбны шоныд муօ, а тулыснас бօр локны гортас, вайны шоныд.

РАКА СЕМЬЯ

Висьт

Вօрысь локтігօн ме кежи кыддза раскօ, коді вօлі сиктсынь неылын. Шы ни тօв. Раскын лօнь. Сօмын менам Черныш понійօй ветлօдлօ-шарօдчօ водзын. Друг ме вылօ уськօдчисны кык рака. Найօ лэбалісны юр весьтті,—сійօ и виччысь—кокыштасны синъястօ. Ме лэпті киясօс да куті օвтчыны киясօн. Черныш ветлօдліс мясянь неылын водзын да мыйкօ исасис-корсис турун пиьсыс. Ракаяс уськօдчисны сы вылօ. Мый нօ тайօ? "Сэні мыйкօ налօн эм!.." —думышті. Ме босьті кос ув да матыстчи Черныш дорօ. Вօлօмкօ, турун пиас сайօдчօма ракаяслօн пиьс. Сійօ пукалօ сэні йօжгыльтчօма, вомсօ паськօдлօ. Ме օдйօджык нуօді Чернышօс сэтысь. Регыд мысти ракаяс ланьтисны.

Лун дас кымын мысти ми бара паныдасим тайօ рака семьяыскօд. Ракапиьс сэки збоя нин чеччаліс му вывті, зілис, буракօ, кыпօдчыны сынօдօ, но пока оз вермы. А батыс да мамыс пукалісны пу йылын, видзօдісны пиьс вылօ да небыдика кравзісны,—ошкисны, ышօдісны пиьсыс. Ми кежим бокօджык, мед не повзьօдны найօс.

МИЧА СЕРПАС

Висът

Со и бара коли гожом. Ёни сомьн казътивны кутам сійос, гожся состом вөр-васо, налысь мичсо да лышкыдлунсо. Дона друг, ми тэкөд часто вөлим вөрас, любуйтчылім сійон. Эн дышөдчы, бара волы татчө да өни пыралам арся вөрас, сентябрь төлысса өти лунө. Ті адзыланндыд кө, ёна чуйманныд, кыдзи сійө өни вежсис. Гөгөр чөв-лөнь, оз нин гожся моз дзользыны лэбачьяс, — найө шойчөны, дасътысьоны ылі туйө. Пуяссө гөгөр быттьө мавтөма мича-мича небыд да шоныд краскаясөн. Локтысь арыс быд пулы козьналөма паськөм. Медся мича, пөжалуй, ловпу. Сылысь гырысь да паськыд корьяссө арыс мавтөма и виж, и вижовгөрд, и пемыдгөрд, и гөрд да ещө мукөд пөлөс рөмөн. Видзөдан да кажитчө, мый сійө абу пу, а уна пөлөс лэбачьяс лэбөны да өшйөмаөсь сынөдас.

Пипу ыпъялө-согчө югыд гөрд рөмөн, быттьө сы увьяс вылө пуксьөма мойдын воом жар-птица.

А кор тэ пыран кыддза раскө, тэнад син водзө сувтөны зарни платтьөа мича нывьяс. Шонді югөрысь зарни корьясыс ставныс дзирдалөны. Видзөдан на вылө, и найө вөрзөдөны тэнсыд сьөлөмтө асланыс чөв-мелілуннас, мичнас. Корьясыс ньөжйө-ньөжйө вашкөдчөны өта-мөдыскөд, өткөн-өткөн гылалөны муас да шебрөдөны мүсө мича эшкынөн.

Пожөмьяс да кызьяс костөд тыдалө пелысь пу, кодлөн чим гөрд корьясыскөд орччөн өшалөны гырысь алөйгөрд розьяс. Мича серпас!

Тэныд кө окота төдмавны, кутшөм пуяс быдмөны вөрас, оз ков видзөдлыны вылө, пуяс вылас. Видзөдлы муас, корьясыс асьныс висьталасны.

ТУРИ

Висьт

Ме пукалі Мизин берег дорын да любуйтчи арся ывла вывнас. А ывлаас вöлі лөнъ, ыркыд. Сэзь лөнъ енэжас öшаліс кöдзавны удитöм нин гөрдоват шонді. Ме видзöдлі вывлань и друг аддзи лöz енэжсьыс тури. Сійö выліті лэбис öтнасөн да корсюрö жугыля горöдлывліс асьыс песня— "курлы-курлы!" Сылөн жугыля горзöмыс кажитчö ыджыд дөйөн, йиджис став вөр-ва пытшкөсас, йöz сьöлөмö.

Мый сійö горзіс? Код төдас. Гашкö, чуксаліс ёртъяссö, кодъяс колисны сійöс, гашкö, асьыс пöдругасö, гашкö, норасис кольöм гожöм вылас? Мыйла сійö колис öтнасөн? Мыйла сійö петіс кузь туйö сёрөн? Та йылысь некод оз төд да и оз кутны төдны.

Мича да тшап лэбачöй, ме тэныд друг, сиа тэныд став бурсö:

—Лэб, донаöй, лэб! Ставыс лоö бур, сöмын лэб!

БУР ТУЙ ТІЯНЛЫ

Висьт

Миян войвылö медводз локтöны, сьöрсьыс тулыс, шоныд вайöны. А öні, арнас, медбöрын лэбöны шоныд муясö. Тайö—сьöд ракаяс. Найö чукортчöмаосьыджыд кельöбö. Со, найö картупель муяс весьтті вöчисны ыджыд кытш, прöщайтчисны чужан муяскöд да веськöдчисны лунвывлань. Лэбисны выль тулысла, выль шоныдла.

Водзын—кузь да сьökыд туй!

Кодкö артавліс эз, кымынысь налы ковмас öвтыштны бордъяснас, кытчöдз оз локны местаöдзыс? Кодкö думыштліс эз, кутшöм сьökыд лэбачьяслөн тайö уджыс! ...Öвтчы, öвтчы бордъяснад, дугдывтöг. Дугдан

өвтчыны—пом воас. Шойччыны пуксян—тэнö некод оз виччысь, сёянтö некод оз сет, корсь ачыл! И висьны оз позы! Некод оз лечит.

И тадзи быд тулыс, быд ар!..

Бур туй тiянлы, лэбачьяс-пöткаяс! Бур туй!

Ми виччысям тiянöс!

МУДЕР КÖЧ

Висьт

М и частö кывлам, мый пемöсьяс пиысь кöч медся полысь, медся бöб. Но тадзи ме эськö эг шу. Öтчыл ме аслам синъясөн аддзылі, кутшöм збоя сійö дорйысьö вөрöгъясысь да кызди сійö кужö мудеритны.

Кызкö öтчыл ме муна вöлі вöрын векни ордымöд. Сійö петкöдіс менö кушинö, эрд вылö. Вöлі сёр ар, муртса лымъялыштöма. Ывлаыс югыд, сэзь, вылын лöсталіс гожся моз лöz енэж.

Видзöдлі вылö. Сэні шлывъяліс кык варыш, буракö, пара. Ме сувті да вель дыр видзöді на вылö. Друг öтиыс на пиысь топöдіс бордьяссö да суніс увлань бадь кустлань: тыдалö, кодöскö сэтысь кыйöдісны да кöсйисны вöтлыны сэтысь. Сідзи и вöлöма. Куст увсьыс тринькнитіс кöч, руд паськöма на, да кутіс тövзыны-лэбны футбол мач моз. Варыш бөр качöдчыліс да бара из моз уськöдчис кöчыл вылö, суöдіс сійöс. Ме повзикодь: мися, кöчылды воис пом. Но, вöлөмкö, он на сійöс сідз босьт! Кöчыл öдйö бергöдчис мыш вылас да бөръя кокнас-лапаяснас чорыда тувкис варышыды. Варышыл, бордьяснас шпорöдчиг, быттö шойöвоши, вешйыштіс бокö, а кöчыл уськöдчис тövзыны водзö. Варышыл бара уськöдчис сы вылö, суніс, но эз веськав: кöчыл друг сяммис чеччыштны бокö, и тайö мездіс сійöс варышлөн лэчыл гыжъясысь.

Ме лов шы кутöмөн видзöді на вылö, мый лоö водзö. А отсавны нинöмөн ог вермы, весиг ружьеöй абу. Чайтаньыл, мый сэсся лои? Видзöда да кöчыл тövзё мелань.

Локтіс ме дорё да мясянь неылё пуксис. А варышыс качис вылё, пёлыс дорё, коді век на шлывъяліс сынодас. Морт дінад, буракё, эз лысыт уськёдчыны кёчыд вылё. Ме сулалышті ещó недыр да мёдодчи водзё. Недыр мысти видзёдлі мыш вылё,—видзёда, кёчыд тапиктё ме бёрся.

Ме сувті. Сійё сувтіс. Ме мёдодча... И сійё мёдодчас. Тадзи ми воим вёр дорёдз. Но мыйён вёр дорышдзыс коли воськов комын, кёчыд тювыштіс вёрас, быттё эз и вёвлы.

А варышъяс энвотісны кёчтё, да кытшъяс вёчаліг, качисны сынодас пыр вылөджык и вылөджык...

Со, кыз, челядь, овлө, а ті шуанныд, мый коч пө полысь пемөс.

МЫЙЛА ПОН ДА КАНЬ ОЗ ЛӨСЯВНЫ?

Важ мойд серти

К оркё, ёна важён нин, пон да кань отлаын локтасны морт дорё да вөзйысьёны сылы удж вылө. Морт видзёдліс на вылө да шуө:
—Ладнө... Ме тiянөс босьта. Но ті аслыныд бөрйөй сэтшөм удж, мед ті радейтінныд сійөс да кутінныд зіля уджавны... Ме ачым уджач морт, и дышъястө терпитны ог вермы.

И ачыс муніс уджавны.

Рытнас, кор бөр локтіс гортас, юалө налысь:

—Но, вай висьтасьөй, коді мый талун вөчис?

Пон видзёдліс көзяин вылө да шуө:

—Ме өшинь увсьыд ручөс вөтлі. Курөгъястө вөлі кыйөдө...

—Но, а тэ мый вөчин?—юалис каньлысь.

—Ме шыр кыйи,—раминика шуис кань.

—Ладнө...—шуис көзяин да сетіс налы ужин: понлы—нянь крөшка шыд тасьті да ещó лы, а каньлы кисьтіс блюйдө йөв.

Каньлы лои завидь. А ачыс думайтө: "Мыйла көзяиныс

понсö вердiс бурджыка? Нинöм он вöч, ачым мыжа... Эз ков ошйысьны, мый шыр кыйи"...

Аскинас бара ставыс разöдчисны удж вылö. Сöмын каньлөн делаыс оз ладмы. То ли шыръясыс мудермисны, то ли мый, но лунтырөн кань эз вермы кыйны ни öти шыр. Да ещö гöбöчыс вöли кöдзыд, и кань ёнакодь кынмис. Рыгъявылыс сийö кайис паччөр вылö шонтысьны.

Рытнас, ужнайтны пуксигөн, кöзиян бара юалö:

—Мый нин талун, другъяс, вöчинныд?

—Ме ыжъястö кöинъясысь видзи... Ёна и мудзи...—вочавидзис пон.

—А ме гöбöчын шыръясöс кыйöди... Зэв ёна кынми...—шуис кань.

Кöзиян бара сетiс налы ужин. Понлы—ыджыд тасьтi тыр сук рок, ыджыд лы, а каньлы—блюдыö йöв.

—Тэ, пöди, кань, шыръяснад пöтiн?.. Уна кыйин?

—Ме эг артав,—пöръялис кань.

Пон пöттöдзыс сёйис да петiс öшинь улас керка-сарай видзны. А кань кайис паччөр вылö тшыг нисьö пöт да кутiс думайтны, кыдзи эськö кöзиянлысь водзöс босьтны. Мыйла сийöс пон дорысь омöльджыка вердö?!

Войнас сийö чеччис да гусьöник петiс сарайö, кöни узьлисны курөгъяс.

Асывнас кöзиян казялис, мый оз тырмы öти курөг. Сийö кутiс видны понсö.

—Чорыда жö тэ узян, пон! Лёка видзан менсьым овмöсöс! Тавой сарайын вөр вöлöма...

—Весьшөрö сiдз шуан, кöзиян,—дорйысис пон.—Войбыд сюръя дорын куйли, синмöс эг куньлы... Керка дорö некод эз воы!.. А волiс кö, ме эськö петкöдлi сылы пуж...

А кань куйлö паччöрын, сöмын кургö.

Вот тадзи найö и кутiсны овны. Кань—пыр керкаын, шоныдiнын, а пон век ывлаын, кöть кутшöм кöдзыд, керка-сарай видзö.

Коркö öтчыд рытнас кöзиян шуö понлы:

—Мыйла тэ, другö, öнöдз вöрсö он вермы кутны?

Кыдзи вой, сідзи и менам мыйкө вошө: то ли кринчаысь нөк, то ли яй кусөк, то ещө мыйкө...

—Да, некод, көзяин, керка дорад эз матыстчыв... Збыль шуа. А воліс кө, ме эськө куті сійөс...

—Но-но! Смотри!—стрөга шуис көзяин.—Меным лөк стөрөжыд оз ков!..

Понлы лои зэв өбиднө. Петіс ывлаө да дзевсис кильчө пос улас да шуис войбыд не вугыртлыны ни өтчыд, а вөрсө кутны...

И вот, кор керкаын ставыс лөнис, сійө кыліс, кыдзи кодкө гусьөнникөн кысьсө сарайлань. Пон уськөдчис эськө, кватитіс вөрсө, но сійө удитіс чепөсйыны потшөс сайө. Пон сөмын чашнитіс сылысь веськыд боксө.

Асывнас пон шуө көзяиныслы:

—Көзяин, талун войнас воліс вөр, а коді, эг вермы төдны. Сөмын ме удиті сылысь веськыд боксө чашнитны...

Пуксисны завтракайтны, а каньыд паччөрын куйлө, оз лэччы...

—Мый нө, кысульө, тэ он лэччы?—юалө көзяин.—Кынөмыд оз сюмав али мый?

—Менам кынөмөй висьсө,—норасьсө кань.—Шыръясөс, буракө, унджык сөйсьөма...

—Куйлы, инө, висян кө,—шуис көзяин.—Ми мунім удж вылө...

И мунісны... Ылөдзкодь нин мунісны, но көзяинлы друг дум вылас уси, мый сійө талун эз верд курөгъяссө. Көзяин котөрөн бөр локтіс гортас, а сарайысь петө кань, вом доръяссө нюлө. Көзяин чуймис, юалө:

—Мыйла нө талун өшинь улын быдлаын чипан гөн?

—Гашкө, руч воліс да,—шуө кань.—Сійө радейтө курөг яйтө...

—А мыйла тэнад чужөм-рожаыд курөг гөнөсь?

—Пөдушкаысь, пөди, сибдісны... Мыссьыны эг на удит...

—А коді нө тэньсыйд боктө чашнитіс?

—Паччөр вывсянь лючки чеччышті да дойми...

—Ылөдлан тэ ставсө,— шуис көзяин. —Тайö тэ вөлөмыд гусясян!.. Тэ гусясян, а ме понмөс мыжала...

И көзяин вөтліс каньсө.

Гашкө, эськө кыкөн и олісны, морт да пон, но өдөлитны кутісны шыръяс. Ковмис каньтө бөр босьтны.

Сөмын вот пон өнөдз миритчыны оз вермы сыкөд. Кор аддзас каньөс, сылы сідзи и окота чашнитны мөдар боксө, мед дугдіс сійө гусясьны.

Та вөсна и пон да кань оз радейтны өта-мөдсө.

Дона челядь, тайö важ мойдсө меным висьталіс бабөй на, кор ме вөлі тіян кодь жө ичөт на.

1991. с. Межадор

КАТША ДА РУЧ

Важ коми мойд серти

Д жуджыд пу вылө Рака вөчис поз да сәні быдтө пиянсө. Позсө казяліс Руч, локтіс сәтчө да горөдіс Ракалы:

— Эй, пөрысь выживь, шыбит татчө өти пи... Он кө шыбит, пусө пөрөда да ставнысө сөя.

Көсйис нин Рака шыбитны муас өти пи, но сәтчө, буретш, веськалі Катша. Сійө пуксис орчча ув вылө да шуис Ракалы:

— Мыйкө тай тәнө ставныс шуөны вежөраөн, а тэ дзик бөб вөлөмыд... Ручыс өд тәнө повзьөдлө. Аддзан, сылөн чер ни пила абу... Бөжнас өд оз пөрөд...

Рака аттьөаліс Катшаөс.

Руч, дерт, скөрмис да быд ногөн заводитіс видны Катшаөс:

— Часлы, суклясьысь лов, ме тәнө велөда... Кытчө оз ков ныртө сюян...

Руч муніс сәтысь, локтіс паськыд эрд вылө, водіс да кывсө нюжөдіс: лэдзчысис кулөм улө. Лэбө сәті Катша, аддзө: төдса Ручыд, буракө, кулөма, оз вөр. Катша пуксис Руч дорө, чеччыштіс кынөм вылас, сәсся юр вылас, — Руч

оз вөрззы. Збоймис Катша да чеччыштис небыд кузь кыв
вылас. А Ручлы тайö и колö вöли: тшапнитис сійöс.

— Öнтай, пеж лов, тэ эн сет меным завтракайтны, а
öни ме тэон öбöдайтa...

— Муса ручö-чойö, тэ ёна эн тэрмась...—кевмысис
Катша.—Менам яйöй збыльысь пеж... Татчö локтигөн ме
лукйыси помöй гуын дай куйöд пытшкын... Вай ме
быглясьышта лысваа турун вылас. Сэки лысваыс менö
мыськас да лoa сöстөм...

Ладнö. Руч лэдзис сійöс. Катша быгыльтчис гоз-
мöдысь и мыйон мынис сійö лапaысь—жбыр лэбис зорöд
сюръя вылö да китш-китш серöктис.

Кодныс на пиысь мудерджыкөн вöлöмаöсь?



ЮРИНДАЛЫСЬ


НИМЛУН КЕЖЛӨ КОЗИН

Нимлун кежлө козин	4
Ключ	7
Папуля, мамуля, Макс да бабуля	9
Шашки	15
Коді баквалыс?	18
Вуграсьны мунігөн	20
Немка	24
Устя	26
Чёртыс дзугис	29
Озъя йов	30
Сдача	32

КОРТӨМ ГӨСЬТ

Кодлы көні бурджык овны? ..	34
Пышкай	36
Аслас прөсек	37
Аддзысьлыгөдз	37
Эз кынмы!	38

Бөрдө кызд пу	39
Тувсов войын	40
Рөзбойник	42
Оз көсйы юксьыны	44
Мыйла скворечникын некод оз ов?	45
Визяорда	45
Утка-мамлөн шог	46
Тар-мам	47
Петрөванлөн слава	48
Йөрш да сын	50
Чери кыйысь кань	51
Кортөм гөсьт	52
Ракапьян	54
Рака семья	55
Мича серпас	56
Тури	57
Бур туй тиялы	57
Мудер көч	58
Мыйла пон да кань оз лөсьвны?	59
Катша да руч	62



**ДЛЯ ДЕТЕЙ МЛАДШЕГО
ШКОЛЬНОГО ВОЗРАСТА**

Литературно-художественное издание

Раевский Степан Семенович

ПОДАРОК КО ДНЮ РОЖДЕНИЯ

*Рассказы и сказки
на коми языке*

Редактор А. В. Тентюков. Художник В. А. Моторин. Художественный редактор В. Б. Осипов.
Технический редактор А. Н. Вишнева.
Корректор Е. С. Панюкова.

ЛР № 010039

Сдано в набор 30.01.95. Подписано к печати 30.02.95.
Формат 60x84^{1/16}. Бумага № 1. Гарнитура "Школьная".
Печать офс. Усл. печ. л. 3,72. Усл. кр.-отт. 7,9. Уч.-
изд. л. 2,92. Тираж 3000. Заказ № 522. Коми книжное
издательство. 167610, г. Сыктывкар, ул. Карла Маркса,
229.

АО "Коми республиканская типография". 167610,
г. Сыктывкар, ул. Первомайская, 70.